



ЛУКАЛЭСЬ ЗЕЧ ИВОР

1-тй ЛЮКЕТ

¹Ми куспын зэмос луэм учырѐс сярысь тросэз веросьѐс кылдыгъяны кутскизы ни бере, ²кудйз сярысь милемлы самой кутсконысеныз ик Кылэз адземѐс но Солы служить каремѐс ивортйзы, – ³соку мон но малпай: ваньзэ кутсконысеныз ик пыр-поч эскерыны но радызъя тыныд гожтыны, гажано Феофил, ⁴тон мед тодод, со дышетон, кудйныз тон тодматскид, оскиськымон луэ шуыса.

⁵Иудеяын*, Ирод эксэй луон нунальѐсы, Авиялэн черодысьтыз Захария нимо священник улэм. Солэн Елисавета нимо кышноез Аарон выжыысь вылэм. ⁶Инмар азын кыкназы но соос шонер улйсьѐс выйллям, Кузё-Инмарлэсь вань курон-косонѐссэ, радьянѐссэ шекланытэк быдэсьяса

* 1:5 Татын вераськон мынэ еврейёслэн быдэсак улон интызы сярысь.

улыллям. ⁷Соослэн нылпизы луымтэ, Елисавета уго нылпи ваисьтэм вылэм. Кыксы но соос арескын мыйыесь вылыллям ини. ⁸Одйг пол, черодэз вуыса, Инмар азын служить карыкуз, ⁹пус чолтыса, кызы каро вылэм священникъёс, солы Кузё-Инмарлэн храмаз ладанэн чындытыны пыроно луэм. ¹⁰Ладанэн чындытон дыръя, вань калык педлон вёсяськоз вылэм. ¹¹Соку солы, ладан жуатыса курбон сётон жоклэн бур палаз сылыса, Кузё-Инмарлэн кылчинэз возматйськем. ¹²Сое адзыса, Захария куалектэм, кышканы кутскем. ¹³Нош кылчин солы шуэм: «Эн курда, Захария, тынад вёсяськемед кылэмын, кышноед Елисавета пи нуны ваёз, солы Иоанн ним сётод. ¹⁴Тыныд шумпотон, шулдыръяськон луоз, солэн вордйськемез понна троез шумпотозы. ¹⁵Уго со Кузё-Инмар азын быдзым луоз, вина но, сур но уз юы, анаезлэн пушказ ик Святой Духен тыр луоз. ¹⁶Троссэ Израиль пиосты Кузё-Инмар соослэн Инмарзы пала берыктоз. ¹⁷Атайёслэсь сюлэмъёссэс нылпиоссы пала берыктыны, кылзйськисьтэмъёсты шонер улысьёслэн визьлыко сюрес вылазы берыктыны, Кузё-Инмарлы калыкез дасян понна, Илиялэн кадь духен но кужымен Кузё-Инмарлэн азытйз со мыноз». ¹⁸Захария кылчинлы шуэм: «Кызы мон сое тодом? Мон уго пересь ини, кышноелэн но аресэз бадзым ини». ¹⁹Кылчин солы ответ сётыса шуэм: «Мон – Гавриил, Инмар азын сылйсь, тонэн вераськыны но та жеч иворез вераны ыстэмын. ²⁰Тани, тон кылтэм улод. Ас дыраз быдэсмоно верам кыльёслы оскымтэед понна, та быдэсмон нуналозь

тынад вераськемед уз луы». ²¹Со дыре калык Захариез витыса улэм, паймем солэн храмын жега-мезлы. ²²Со потэм но, соослы номыр но верамез луымтэ. Соос валаллям, со храмын адзон адзем шуыса. Соосын со кипусьёс пыр гинэ валэкьяськем, вераськемез луымтэ. ²³Служить карон нунальёсыз йылпумьяськем бере, дораз бертэм. ²⁴Та нунальёс бере солэн кышноез Елисавета, нуны ваёно луэм. Вить толэзь ёже адямиослэсь ватыса улэм. Елисавета шуэм: ²⁵«Адямиос пöлын монэ медаз ни ултйялэ шуыса, монэ жаляса, та виын тазы лэсьтйз Кузё-Инмаре».

²⁶Куатетй толэзез мыныку, Инмар Гавриил кылчинэз Галилеяысь Назарет каре, ²⁷Давид юртысь Иосиф нимо пиосмуртлы курам Ныл доры ыстэм. Со Ныллэн нимыз: Мария. ²⁸Кылчин Со доры пырыса шуэм: «Шумпот, Дэлето! Кузё-Инмар Тонэныд; кышноос кустын Тон бакель каремын». ²⁹Сое адзыса, солэн кыльёсызлэсь Со кепырам, малы меда та таёе зечкылан, шуыса малпам. ³⁰Кылчин Со лы шуэм: «Эн кышка, Мария, Тон Инмар дорын дэлет басьтйд. ³¹Тани Тон секытэн луод, Пи ваёд но Со лы Иисус ним сётод. ³²Со луоз быдзым, Вылысь Инмарлэн Пиез шуыса нимаськоз. Со лы Кузё Инмар Давидлэсь, Солэн ата-езлэсь, эксэй пуконзэ сётоз. ³³Пумтэм даурьёс ёже Иаковлэн юртэзлы Со эксэй луыса пукоз, Солэн Эксэйлыкезлэн пумыз уз луы». ³⁴Нош Мария кылчинлы шуэм: «Кызы та луыны быгатоз, куке Мон пиосмуртэз уг тодйськы?» ³⁵Кылчин Со лы ответ сётыса шуэм: «Святой Дух Тон вылэ васькоз, Вы-

лысь Инмарлэн кужымез Тонэ шобыртоз. Соин ик, Тынэсьтыд вордйськем Дун-Сьӧлыктэм, Инмар Пи шуыса нимаськоз. ³⁶Тани, Елисавета но, Тынад выжы-кумыед, нылпи ваисьтэм шуо вал, пересь даураз пи нуны ваёно луиз, солэн куатетй толэез ни. ³⁷Уго Инмарлэн одйгез но верам кылыз быдэсмытэк уз кылы». ³⁸Соку Мария шуэм: «Тани Мон Кузё-Инмарлэн ляльчиез; тынад кылыдья Мыным мед луоз». Собере кылчин Со дорысь палэнскем.

³⁹Со нунальёсы Мария султэм но дыртыса гурезё шаере, Иудалэн городаз мынэм, ⁴⁰Захариялэн корказ пырем но Елисаветаез зечкылам. ⁴¹Елисавета Мариялэсь зечкыламзэ кылэм бере, солэн пушказ нуныез вырзем; Елисавета Святой Духен тыр луэм. ⁴²Бадзым куараен вазиськем но шуэм: «Кышноос пӧлысь ваньмызлэсь золгес Тон бакель каремын, бакель каремын Тынад пушкысьтыд емышед но! ⁴³Кытысен та зечлык мыным: Кузё-Инмарелэн Анаез мон доры лыктйз? ⁴⁴Уго Тынад зечкылан куараед кылйськыку, нуны шумпотыса пушкам вырзиз. ⁴⁵Шудо Оскем Мурт, – Кузё-Инмарлэн Со лы верамез быдэсмоз».

⁴⁶Мария шуэм:

«Мынам лулы Кузё-Инмарез данья,

⁴⁷духе Инмарлы, Утиселы, шумпотэ,

⁴⁸Аслэсьтыз покчи ляльчизэ Со жаляса учкиз.

Та дырысен вань выжыос Монэ

шудо мурт шуозы,

⁴⁹Кужмо Мыным бадзым ужъёс лэсьтйз,

Солэн нимыз святой,

⁵⁰Солэн гажан-жалянэз Солэсь кышкасьёс понна
выжыосысь выжые улоз.

⁵¹Со Ас кыизлэсь кужымзэ возьматйз,

сюлмазы выль мылкыдо малпанэн

ульсьёсты пазыгиз.

⁵²Кужмоосты пукон интысьтызы уськытйз,

нош востэмьёсты жутйз.

⁵³Сютэмьёсты ваньбуро кариз,

нош узырмемьёсты номыртэк но лэзиз.

⁵⁴Аслэсьтыз ляльчизэ Израилез бордаз кариз,

жалянэз тодэ вайыса –

⁵⁵кызы шуиз вал атайёсмылы

– Авраамлы но солэн кидысэзлы

пумтэм вапумозь».

⁵⁶Мария соин чош куинь толэзь мында улэм но
аслаз дораз бертэм.

⁵⁷Елисаветалэн нылпи ваён дырыз вуэм; со пи
нуны ваем. ⁵⁸Бускельёсыз, чыжы-выжыосыз Кузё-
Инмарлэсь сое юн гажам-жалямзэ кылзйллям но
соин валче шумпотйллям. ⁵⁹Тямысэти нуналаз ну-
нылы вандйськон сямеэ ортчытыны лыктйллям
но, атаезлэн нимызья, солы Захария ним сётыны
туртто вылэм. ⁶⁰Талы солэн анаез шуэм: «Өвёл;
сое Иоанн шуыса нимано». ⁶¹Нош солы шуиллям:
«Тынад выжы-кумыед пöлын та нимез нулйсь
нокин но өвёл». ⁶²Атаезлэсь пусьёс пыр юалйллям,
кыче ним со сётысал шуыса. ⁶³Со пул курем но
гожтэм: «Иоанн солэн нимыз». Ваньзы паймил-
лям. ⁶⁴Соку ик солэн кылыз-ымыз усьтйськем но,
Инмарез даньяса, со вераськыны кутскем. ⁶⁵Со
котырын ульсьёс ваньзы кышкатскиллям; Иу-

деялэн быдэс гурезё шаераз ваньмыз та сярысь вераськиллям. ⁶⁶Ваньмыз кылэм муртъёс тае сюлмазы возиллям но вералйллям: «Кыче пинал та луоз?» Кузё-Инмарлэн кыиз со вылын улэм.

⁶⁷Солэн атаез, Захария, Святой Духен тыр луэм но азыпалзэ тодытыса шуэм:

⁶⁸«Кузё-Инмар, Израильлэн Инмарез дано:

Аслаз калыкез шоры гажаса учкиз но солы мозмытйськон сётйз;

⁶⁹Аслаз ляльчиезлэн, Давидлэн выжыысьтыз милемлы утиськонлэсь сюрзэ жутйз.

⁷⁰Аслаз вашкала дырысь святой пророкёсызлэн кылынызы-ымынызы ивортйз,

⁷¹тушмонёсмылэсь, вань синазькыль карисьёслэсь милемыз утёз;

⁷²милям атайёсмылы гажан-жалянзэ возматоз но

Аслэсьтыз святой сизён-косонзэ тодаз ваёз.

⁷³Милям Авраам атаймы азын кыл сётыса вераз:

⁷⁴милемды тушмонёсмылэн ки улысьтызы мозмытоз,

⁷⁵улонмылэн вань нунальёса Солы дун-сьöлыктэм мылкыдын, шонерлыкен Солы кышкатэк служить карыны.

⁷⁶Тон, нуны, Вылысь Инмарлэн пророкез шуыса нимаськод, тон уго Кузё-Инмарлэн азьтйз мынод Солы сюрес дасяны,

⁷⁷сьöлыкёссэс куштыса утиськон сярысь Солэн калыкезлы валан сётыны,

⁷⁸Инмармылэн сюлмысьтыз гажан-жалянэныз,
кудйныз асьме доры йылысен

Шунды жужан лыктйз,

⁷⁹пеймытын но кулонлэн вужераз

пуксисьёсты югдытыны,

пыдъёсмес тупаса улонлэн

сюрес вылаз поттыны».

⁸⁰Нуны будэм, лулыныз-сюлмыныз юнмам,
Израиль калыклы возматскон нуналыз вуытозь,
кыр дуннеосын улэм.

2-тй ЛЮКЕТ

¹Со нунальёсы быдэс дуннеысь калыкез гождьян
сярысь Август кесарьлэн косонэз потэм. ²Кви-
риниялэн Сириен кивалтыса улон дыръяз, та ны-
рысетйез калыкез гождьян былэм. ³Ваньзы, коть-
кудйз аслаз городаз гождтйськыны мынйллям. ⁴Га-
лилеяысь Назарет карысь Иосиф но мынэм Иу-
деяе, Давидлэн Вифлеем шуон городаз. Уго со
былэм Давидлэн юртысьтыз, выжысьтыз. ⁵Со
гождтйськыны мынэм кышноеныз Марияен. Соку
Мария секытэн былэм. ⁶Соос отын луон дыръя,
Солы нуны вайыны дыр вуэм. ⁷Ваем нырысетй
Пизэ, кутэтэн бинялтэм Сое но турын тыронэ
понэм, малы ке шуоно, кунокуаын* соослы инты
сюрымтэ.

* 2:7 Гостиница.

⁸Со шаерын пудо возьмасьёс уин бусыын пудо уллэзэс возьмаса пуко вылэм. ⁹Шөдтэк шорысь соослы Кузё-Инмарлэн кылчинэз возьматскем но Кузё-Инмарлэн пиштйсь данлыкез соосты югдытэм. Соос вераны луонтэм кышкаллям. ¹⁰Нош кылчин соослы шуэм: «Эн курдалэ; мон тйледлы быдзым шумпотон ивортйсько, со вань адямиос понна луоз: ¹¹тй понна туннэ Давидлэн городаз Утись вордйськиз, Со – Христос Кузё-Инмар. ¹²Тани тйледлы тодмет: турын тыронысь кутэтэн бинялтэм Нуныез тй шедьтоды». ¹³Инмарез даньяса, кылчинэн валче лыдьянтэм трос ин кужымьёс шуак вуиллям но вазиськиллям:

¹⁴«Дан вылйсь Инмарлы,
музьем вылын каньыллык,
адямиослы зеч эрик».

¹⁵Кылчиньёс соос дорысь Инме кошкем бере, пудо возьмасьёс ог-огзылы шуиллям: «Мыноме Вифлееме но учкоме, мар отын луиз, кудйз сярысь асьмелы Кузё-Инмар ивортйз». ¹⁶Дыртыса вуиллям но соос Марияез но, Иосифез но, турын тыронын кыллись Нуныез но шедьтйллям. ¹⁷Адзем беразы вераллям, мар ивортэмын вал соослы та Нуны сярысь. ¹⁸Ваньзы кылзйськем муртъёс пудо возьмасьёслэн верамзылы паймиллям. ¹⁹Нош Мария вань та кыльёсты сюлмаз утьыса возем. ²⁰Пудо возьмасьёс ваньмыз понна, мае кылйллям, мае адзиллям, кызы соослы верамын вал, Инмарез даньяса, ушьяса, асьсэ доры бертйллям.

²¹Тямыс нунал ортчыса, Нунылы вандйськон сямез орччтон дыр вуэм. Соку Солы Иисус ним

сөтйллям. Анай пушкын кылдэмеэзлэсь азьвыл ик кылчин Сола та нимез сөтэм.

²²Чылкытатскон нунальёс ортчем бере, Моисейлэн законэзлэн косэмеэзья, Сое Иерусалиме Кузё-Инмар азе султытыны ваиллям. ²³Кузё-Инмарлэн законаз гожтйськемын: анай пушкысь нырысь потэм котькудйз пи нуны Кузё-Инмарлы сйземын луыны кулэ. ²⁴Кузё-Инмарлэн законаз верамын на, кык кыр дыдыкъёсты яке кык дыдыкпиосты курбон сётыны кулэ шуыса.

²⁵Соку Иерусалимын Симеон нимо адями вылэм. Со шонер улйсь, Инмарлы туж оскыса, Израильлэсь буйгатсконзэ витись мурт вылэм. Святой Дух со вылын улэм. ²⁶Сола Святой Дух пыр верамын вылэм, Кузё-Инмарлэсь Христоссэ адзытэк, кулонэз уд адзы шуыса. ²⁷Духен тыр луыса, со храме лыктэм. Анай-атаез Иисус Нуныез законын гожтйськем сямез быдэстон понна храме ваем бере, ²⁸Симеон Сое кияз басытэм но Инмарлы тау карыса шуэм:

²⁹«Аслад верам кылыдья, Инмар Атае, ляльчиедлы каньыллык сётыса туннэ лэзиськод.

³⁰Тынэсьтыд мозмытондэ

мынам синьёсы адзизы ни,

³¹Тон сое вань калыкъёслэн син аязы дасяд уго:

³²язычникёслы Со югдытскон луоз,

Израиль калыкедлы данлык луоз».

³³Со сярись верамлы Иосиф но, Солэн Анаез но паймиллям. ³⁴⁻³⁵Симеон соосты бакель карем но Солэн Анаезлы, Мариялы, шуэм: «Тани, Та Нуны пыр Израильысь тросэз погралоз, тросэз жу-

тйськоз. Тросэзлэн сюлэм малпанъёссы мед усь-
тйськозы шуыса, Со котырын трос ченгешонъёс
луозы. Тынад аслад но лул пыртїд палаш потоз».

³⁶Татын вылэм на Анна нимо нылкышно пророк.
Со Асир выжыысь Фануиллэн нылыз вылэм, туж
бадъым арлыдэ вуэм, ныл дыръяз бызьыса
кертэныз сизьым ар улэм мурт. ³⁷Ог тямыстон
ныль аресъем палкышно, со храм дорысь кош-
кылытэк, уй но нунал визяса, вöсяськыса, Инмар-
лы ужаса-тыршыса улэм. ³⁸Соку со матэ лыктэм
но Кузё-Инмарез данъяса, Иерусалимын моз-
мытсконэз возьмаса улйсьёслы, ваньзылы Иисус
сярысь вераса улэм.

³⁹Кузё-Инмарлэн законэзъя ма кулэ вал лэсь-
тыны ваньзэ лэсьтэм беразы, соос Галилеяысь
Назарет каразы берытскиллям. ⁴⁰Нуны будэм,
лулыныз-сюлмыныз юнмам, визьмын тыр луэм;
Инмарлэн дэлетэз Со вылын улэм.

⁴¹Арлы быдэ Солэн анай-атаез Быдъымнуналлы
Иерусалиме ветлйллям. ⁴²Солы дас кык арес тыр-
мон аре, азьло сямен ик, соос праздниклы Иеру-
салиме лыктйллям. ⁴³Праздник нунальёс ортчем
бере, бертыкузы пинал Пи Иисус Иерусалиме
кылем. Тае Иосиф но, Солэн Анаез но шөдйл-
лянтэ, ⁴⁴Со мукетъёсын ёош бертэ кожаллям. Ну-
нал сюресэз ортчем беразы гинэ, Сое ёыжы-вы-
жыоссы, тодмооссы пöлысь утчаны кутскиллям,
⁴⁵но шедьтйллянтэ. Сое утчаса Иерусалиме бе-
рытскиллям. ⁴⁶Куинь нунал ортчыса, Сое храмысь
дышетйсьёс пöлысь шедьтйллям. Соослэсь кыл-
зйськыса, юалляськыса Со пуке вылэм. ⁴⁷Ваньзы

кылзйськисьёс Солэн визьмызлы но, ответ сётэмъ-
ёсызлы но паймиллям. ⁴⁸Сое адзыса чабкиськил-
лям, Анаез Солы шуэм: «Пие! Мар Тон милемын
лэсьтйд? Тани Тынад атаед но, мон но, туж ку-
ректыса, Тонэ утчамы». ⁴⁹Соослы Со шуэм: «Ма-
лы тйледлы Монэ утчаны кулэ вал? Оло тй өд
тодэ, Мыным отын луыны кулэ вал, кытын Мы-
нам Атаелэн кыыз улэ?» ⁵⁰Нош соос Солэсь верам
кылзэ валаллянтэ. ⁵¹Соосын ёош Со кошкем,
Назаретэ вуэм; соослэсь кылзйськыса улэм. Солэн
Анаез ваньзэ та кыльёсты аслаз сюлэмаз возем.
⁵²Иисус визьмын но, арлыдын но будэм; Инмарлы
но, адямиослы но Со яратыны ярамон вылэм.

3-тй ЛЮКЕТ

¹Тиверий кесарьлэн кивалтонэзлэн дас витетй
араз, Иудеяын кузёяськыса Понтий Пилат улон
аре, Галилеяын ньылетй люкетыныз кивалтйсь
луыса Ирод улэм. Солэн Филипп братэз Итуреяын
но Трахонит ёросын, нош Лисаний – Авилинеяын
ньылетй люкетыныз кивалтыса улйллям. ²Соку,
Анна но Кайафа архиерейёс дырря, Захариялэн
пиезлы Иоанлы кыр дуннеысен Инмарлэсь веран
вылэм. ³Сьöлыкёсты куштон понна, öбкельыса
пылатйськон пыр воштйськон сярысь тодытыса
со котыр Иордан ёростй ветлэм. ⁴Исаия пророклэн
кыл книгаяз гожтэмын:

«Кыр дуннеын кесиськисьлэн куараез:
Кузё-Инмарлы сюрес дасялэ,

шонертэлэ Солы сюресэз.

⁵Котькыче нёжал но пачыл мед луоз,
котькыче гурезь но выр мед лапегалозы,
кырыж интыос мед шонералозы,
выро-гопо сюресъёс мед ёошкыталозы.

⁶Котькудиз но лулмугор
Инмарлэсь утёнзэ адёоз».*

⁷Со доры пылатйськыны лыктэм калыклы Ио-
анн шуэм: «Съёд кыйлэн вордосъёсыз! Вуоно
вожпоттонлэсь пегзыны кин тйледлы валэктйз?
⁸Обкельыса съёлыкъёстэс быдтыны ярамон
емышьёс будэтэлэ ук, эн но малпалэ пушкады
вераны: "Атаймы милям Авраам". Тйледлы мон
верасько: Инмар та изъёслэсь Авраамлы нылпи
карыны быгатоз. ⁹Тйр но писпуос выжыын кылле
ини: ёеч емыш ваисьтэм котькудзэ но писпуэз
корало но тылэ кушто». ¹⁰Калык солэсь юам:
«Мар бен милемлы кароно?» ¹¹Соослы ответ сё-
тыса со шуэм: «Кинлэн кык дйсянэз, одйгзэ овёл-
тэм муртлы сёт; кинлэн сиёнэз вань, озьы ик кар».
¹²Выт бичасьёс но пылатйськыны лыктйллям.
Соос солы шуиллям: «Дышетйсь! Мар милемлы
кароно?» ¹³Соослы со ответ сётэм: «Тйледлы мар
сётэмын, солэсь номыр но мултэссэ эн куре».
¹⁴Солэсь солдатъёс но юаллям: «Милемлы нош
мар кароно?» Соослы со шуэм: «Нокинэ но эн
ултйялэ, эн урттылйське, сётэм уждунэныды тыр
луэ».

* 3:4-6 Ис. 40:3-5.

¹⁵Калык возъмаськыса улон дыръя, ваньзы Иоанн сярысь та Христос өвёл меда шуыса, сюлмазы малпанэн уйллям. ¹⁶Иоанн ваньзылы ответ сётэм: «Мон тйледыз вуэн пылатйсько, но лыктэ мынэсьтым Кужмоез, Кудйзлэсь пыдкучан эзэ пертчыны мон ярамон өвёл. Со тйледыз Святой Духен но тылын пылатоз. ¹⁷Солэн сускичез но кияз ини, Со Аслэсьтыз итымзэ сузялоз, чабейзэ кеносаз люкалоз, нош куроэзэ кысылйсьтэм тылэн сутоз». ¹⁸Соосты дышетыса трос мукет зеч иворъёс со верам калыклы. ¹⁹Иоанн Иродэз – ньылетй локетыныз кивалтйсьез, аслаз агаезлэн кышноеныз Иродиадаен азыса улэмез, нош озыы ик Иродлэн вань урод ужъёсыз понна, сое шара куаретылэмез понна, – ²⁰ваньмыз борды Ирод тае ватсам на – Иоаннэз пытсэтэ ворсатэм.

²¹Вань калык пылатйськем. Иисус но пылатйськем; пылатйськем бераз вöсьяськыса улыкуз ин усьтйськем, ²²Со вылэ дыдык выллем мугорын Святой Дух лэзиськем. Инмысен куара кылйськем: «Тон Мынам яратоно Пие. Тон бордын Мынам зеч эрике!»

²³Тодытыны кутскыкуз, Иисуслы ог куамын арес котырын вылэм. Малпало вылэм Со Иосифлэн пиез шуыса, нош таиз Илийлэн, ²⁴Матфатлэн, Левийлэн, Мелхийлэн, Ианнайлэн, Иосифлэн, ²⁵Маттафийлэн, Амослэн, Наумлэн, Еслимлэн, Наггейлэн, ²⁶Маафлэн, Маттафийлэн, Семейлэн, Иосийлэн, Иудалэн, ²⁷Иоаннанлэн, Рисайлэн, Зоровавельлэн, Салафиильлэн, Нирийлэн, ²⁸Мелхийлэн, Аддийлэн, Косамлэн, Елмодамлэн,

Ирлэн, ²⁹Иосиялэн, Елиезерлэн, Иоримлэн, Матфатлэн, Левийлэн, ³⁰Симеонлэн, Иудалэн, Иосифлэн, Ионанлэн, Елиакимлэн, ³¹Мелеайлэн, Маинанлэн, Маттафайлэн, Нафанлэн, Давидлэн, ³²Иессейлэн, Овидлэн, Воозлэн, Салмонлэн, Наассонлэн, ³³Аминадавлэн, Арамлэн, Есромлэн, Фареслэн, Иудалэн, ³⁴Иаковлэн, Исааклэн, Авраамлэн, Фаралэн, Нахорлэн, ³⁵Серухлэн, Рагавлэн, Фалеклэн, Еверлэн, Салалэн, ³⁶Каинанлэн, Арфаксадлэн, Симлэн, Нойлэн, Ламехлэн, ³⁷Мафусаллэн, Енохлэн, Иаредлэн, Малелеиллэн, Каинанлэн, ³⁸Енослэн, Сифлэн, Адамлэн, Инмарлэн шуыса.

4-тй ЛЮКЕТ

¹Иисус Иордан дурьсь Святой Духен тыр луыса бертэм. Дух Сое кыр дуннее нуэм. ²Отын ньыльдон нунал ёже дьявол Солэсь визьзэ сынаса улэм. Со номыр но сиымтэ, та нунальёс ортчем бере, бёрысь кётыз сюмам. ³Дьявол Солы шуэм: «Инмар Пи ке Тон, та изээ нянь луыны кос». ⁴Солы ответ сётыса, Иисус шуэм: «Гожтэмын, нянен гинэ уз улы адями, Инмарлэн котькуд кылыныз со улоз». ⁵Сое жужыт гурезь йылэ тубытыса, дьявол Солы син куспын дунне вылысь вань эксэйлыкьёсты возматэм, ⁶Дьявол Солы шуэм: «Вань та эксэйлыкьёсын кивалтыны Тынад кияд кужым сёто, соослэсь данзэс но, уго соос мыным сётэмын, нош мон кинлы сётэме потэ, солы сое сётисько.

⁷Озыен, Тон мыным йыбырттйд ке, ваньмыз Тынад луоз». ⁸Иисус солы ответ сётыса шуэм: «Кошкы Мон дорысь, шайтан; гожтэмын ук:

”Кузё-Инмарлы, Инмаредлы йыбыртъя, Солы Огназлы гинэ ужа”».*

⁹Соку дьявол Иисусэз Иерусалиме нуэм, храмлэн липет йылаз Сое султытэм но шуэм: «Инмар Пике Тон, татысен уллань тэтчы. ¹⁰Гожтэмын ук:

”Тонэ Ас кылчинъёсызлы утыны косоз.

¹¹Ки йылазы Тонэ нуозы,

пыдыныд из борды медад канжаськы”».*

¹²Иисус солы ответ сётыса шуэм: «Верамын: ”Кузё-Инмарлэсь, Инмаредлэсь визьзэ эн сына”». ¹³Вань визь сынанъёссэ быдтэм бераз, дьявол Со дорысь огдырлы кошкем.

¹⁴Духлэн кужмыныз тыр луыса, Иисус Галилеяе берытскем. Со сярысь вераськонъёс котыр ёросъёсы вёлмиллям. ¹⁵Соосты Иисус синагогаязы дышетэм, ваньзы Сое данъяллям.

¹⁶Быдэ вуэм городаз, Назаретэ лыктыса, Со суббота нуналэ, огдышем сяменыз, синагогае пырем но лыдзыны султэм. ¹⁷Солы Исаия пророклэсь книгазэ сётйллям. Иисус книгаез усътэм но тазы гожтэм интызэ шедьтэм:

¹⁸«Кузё-Инмарлэн Духез Мон вылын:

Со Монэ вйын зырзёса пуктйз.

Куанерьёслы Зеч Ивор вераны,

* 4:8 Втор. 6:13.

* 4:10-11 Пс. 90:11-12.

сюлмынызы чигиськыса улйсьёсты

бурмытыны Монэ ыстйз,

тушмон ки улэ сюремьёслы

мозмытсконзэс ялыны,

синтэмьёсты адзись карыны,

курадзйтэмьёсты эрике лэзыны,

¹⁹Кузё-Инмарлэсь зечлыко арзэ тодытыны».*

²⁰Книгазэ ворсаса, отын ужасьлы сётэм но пуксем.

Синагогаын ваньзылэн синьёссы Со шоры мерт-

чиськиллям. ²¹Иисус соослы вераны куткем: «Та

гожтэм, кудзэ тй кылйды, туннэ быдэсмиз».

²²Ваньзы Со сярысь умоен гинэ вераллям. Солэн

ымысьтыз потэм кыльёслэн дэлетсылы паймил-

лям, куспазы вераськиллям: «Та Иосифлэн пиез

өвёл-а?» ²³Иисус соослы шуэм: «Зэм ик, тй Мыным

та визькылэз вералоды: "Йёнатйсь! Астэ Ачид йё-

наты. Татын но, Аслад вордйськем шаерад лэсьты,

мар вал Капернаумын, кудйз сярысь ми кылй-

мы"». ²⁴Собере шуэм: «Зэм ик тйледлы верасько:

одйгзэ но пророкез аслаз вордйськем шаераз ка-

был уг басьто. ²⁵Зэмзэ тйледлы верасько: Изра-

ильын трос вал Илия дыръя палкышноос, куке

куинь ар но куать толэзь чоже ин ворсаськыса

улйз; соин сэрен быдэс музейем вылын секыт

сютэм ар луиз. ²⁶Огзы доры но, Сидон Сарепта

карысь палкышно доры сяна, Илия лэземын ой

вал. ²⁷Елисей пророк дыръя Израильын трос вал

гижло черен висись адымиос, нош огез но,

* 4:18-19 Ис. 61:1-2.

Сирияысь Нееман сянаез, өз чылкыта». ²⁸Синагогаысь ваньзы, тае кылыса, туж йыркурьяськиллям. ²⁹Султйллям но Сое городысьтызы улляса лэзиллям. Городзы гурезь бамалын интыяськемын вылэм; Сое гурезь йылэ тубытйллям, отысен куштыса лэзён вылысь. ³⁰Нош Иисус пөлтйзы потыса кошкем.

³¹Галилеяысь Капернаум каре Со вуэм. Отын суббота нуналэ соосты дышетыса улэм. ³²Паймиллям Солэн дышетонэзлы, уго Солэн верам кылаз кужымез шөдйське вылэм. ³³Синагогаын перияськем адями вылэм, со бадзым куараен кесиськем: ³⁴«Назаретысь Иисус, ми бордын Тынад мар ужед? Кошкы! Тон милемыз быдтыны лыктйд. Тодйсько Тонэ, кин Тон, Инмарлэн Святоез». ³⁵Иисус сое дугдытэм но шуэм: «Чалмытскы. Пот со пушкысь». Пери со адямиез синагога шоры погыртэм но солэн пушкысьтыз чик вöсь карытэк потэм. ³⁶Ваньзы ик туж зол кышкатскиллям но, куспазы вераськиллям: «Мар таёе та, Со Аслаз эрикеныз, кужыменыз периосты потыны косэ но, соос пото?» ³⁷Иисус сярысь ивор котыр интыосы вöлмем.

³⁸Синагогаысь потыса, Иисус Симонлэн корказ пырем. Симонлэн варманаез пöськылен туж курадзыса кылле вылэм. Сое юрттыны куриллям. ³⁹Кышномуртлэн матаз лыктыса, пöськыльлы алыса верам но солэн пöськылез бырем. Соку ик кышномурт султэм но соослы юрттйськыса улыны кутскем. ⁴⁰Шунды пуксён вадес пöртэм черъёсын висисьёссэс Иисус доры вайылйллям. Коть-

кудзы вылэ кизэ поныса, соосты Со бурмытъям.
⁴¹Тросэз пушкысь периос кесяськыса потыллйлям
 но шуиллям: «Тон Христос, Инмарлэн Пиез». Сое
 Христос шуыса асьсэлэсь тодэмзэс медаз вералэ
 шуыса, Со соосты алэм.

⁴²Нунал вордйськем; Со калыктэм интые потыса
 кошкем. Калык Сое утчам но матаз лыктыса,
 дорысьтызы медаз кошкы шуыса, жегатыса во-
 зиллям. ⁴³Нош Иисус соослы шуэм: «Мукет го-
 родьёслы но Инмар Эксэйлык сярысь Жеч Иворез
 Мон вераны кулэ, со понна ик Мон ыстэмын уго».
⁴⁴Галилеяысь синагогаосын тодытыса-дышетыса
 улэм.

5-тй ЛЮКЕТ

¹Огпол, Инмар кылэз кылон понна, калык Иисус
 борды жиптйськыса улэм. Со Геннисарет зарезь
 дурын сылэм. ²Зарезь вылын сылйсь кык пыжь-
 ёсты адзем. Чорыгасьёс пыжысьтызы потыса
 калтонъёссэс гыляло вылэм. ³Соку Со Симонлэн
 пыжаз пырем но ярдурысь ожытак палэнэгес
 полысаны курем. Со пуксем но пыжысен калыкез
 дышетыны кутскем. ⁴Дышетыса дугдэм бераз,
 Симонлы шуэм: «Мур азегес полыса, чорыг ку-
 тылыны калтондэс вуэ лэзе». ⁵Солы ответ сётыса,
 Симон шуэм: «Дышетйсь! Ми уйбыт тыршимы,
 нош номыр но ом кутэ; но Тынад косонэдья кал-
 тонэз лэзё». ⁶Тае лэсьтэм беразы, туж трос чорыг
 кутйллям, калтонзы ик жезиськылэм. ⁷Соослы

юрттйськыны мед лыктозы шуыса, мукет пыжысь эшъёссылы тодмет возъматйллям. Лыктйллям но кыксэ ик пыжез тырмытйллям, пумен выйыны кутскиллям. ⁸Тае адзыса, Симон Иисус азе пыдес вылаз уськытскем но шуэм: «Кузё-Инмаре! Пот мон дорысь, мон съёлыко аядми уго». ⁹Со но, ваньзы соин ёош вылэмъёс, калтыса кутэм чорыгзы трос луэмысь, туж куалектйллям; ¹⁰озы ик Симонлэн эшёсыз, Зеведей пиос, Иаков но Иоанн. Иисус Симонлы шуэм: «Эн курда; та дырысен тон аядмиосты кутылод». ¹¹Кыксэ но пыжъёсты ярдуре поттйллям; собере марзы вань, ваньзэ кельтйллям но Со съёры мынйллям.

¹²Иисус одйгаз городын улыку, быдэс мугорзэ гижло басьтэм мурт лыктэм но, Иисусэз адзыса, ымныр вылаз уськытскыса, сюлворыса Солэсь курем: «Кузёе! Чылкытатэмед потйз ке, монэ чылкытатэмед луоз». ¹³Иисус кизэ жутыса со мурт борды йётйськем но шуэм: «Мынам чылкытатэме потэ, чылкыта». Соку ик солэн гижло через бырем.

¹⁴Иисус нокинлы но та сярысь вераны лэзьымтэ, священник доры мыныны но, кызы косйз Моисей, чылкытамез понна курбон сётыны косэм, – соослы возъматон понна. ¹⁵Озы ке но, Иисус сярысь ивор паськыт вёлмем. Сое кылзыны но асьсэлэн висёнъёссылэсь йёнатйськыны туж трос калык Со котыре лыктэм. ¹⁶Нош Со калыктэм интыосы кошкыса, отын вёсяськыса улэм.

¹⁷Одйг нунал, дышетыса улыкуз, татын пукиллям Галилеялэн вань гуртъёсысьтыз, Иудеяысь, Иерусалимысь лыктэм фарисейёс но

законлы дышетйсьёс. Кузё-Инмарлэн кужымез висисьёсты бурмыгъяку возьматскылэм. ¹⁸Тани, кинъёс ке но валес вылын пери шуккем муртэ ваиллям но, корка пыртыса, Иисус азе поныны тыршиллям. ¹⁹Трос калыкен сэрен, пыртон инты шедьтытэк, корка йылэ тубиллям но липет пыр, валесэныз валче, коркалэн шораз, Иисус азе лэзиллям. ²⁰Соослэсь осконзэс адъыса, со муртлы Иисус шуэм: «Тынад съöлыкъёсыд куштйсько». ²¹Книга тодйсьёс, фарисейёс куспазы вераськиллям но шуиллям: «Кин со Инмарез сантэмась? Одыг Инмар сяна, кин съöлыкъёсты куштыны быгатэ?» ²²Соослэсь малпанзэс шöдыса соослы ответ сётыса, Иисус шуэм: «Мар тй сюлмады малпаськоды? ²³Мае капчигес вераны: "Тынад съöлыкъёсыд куштйсько" яке шуыны: "Султы но ветлы"?» ²⁴Адями Пилэсь музъем вылын съöлыкъёсты куштыны кужым ваньзэ тй мед тододы шуыса, — пери шуккем муртлы Со шуэм: «Тыныд верасько: султы, басьты валестэ но берт дорад». ²⁵Соку ик соос азын со султэм, валессэ басьтэм но, Инмарез данъяса, дораз бертэм. ²⁶Ваньзы туж кышкаллям, Инмарез данъяллям; кышканэз адзем муртъёс шуиллям: «Паймымон ужъёсты ми туннэ адзимы».

²⁷Та бере Иисус потэм. Выт бичан интыын пукись Левий нимо выт бичасез адзем но солы шуэм: «Мон съöры мын». ²⁸Со, маиз вань, ваньзэ кельтэм, султэм но Со съöры кошкем. ²⁹Иисус понна Левий аслаз корказ бадзым сиён-юон ортчытэм.

Отын трос выт бичасьёс, мукет адямиос но вы-
лйллям, ваньзы соосын чёш сиськиллям. ³⁰Нош
фарисейёс но книга тодйсьёс зургетыса улйллям,
Иисуслэн дышетскисьёсызлы шуиллям: «Малы тй
выт бичасьёсын, съёлыкоосын чёш сииськоды,
юиськоды?» ³¹Иисус соослы ответ сётыса шуэм:
«Висисьтэмьёслы эмьясь кулэ өвёл, висисьёслы
со кулэ. ³²Шонер улйсьёсты отьыны Мон ой лык-
ты, съёлыкоосты өбкельыса съёлыкьёссылэсь
куштйськонэ отьыны лыктй».

³³Иисуслы шуиллям: «Малы Иоаннлэн дышете-
кисьёсыз чём визяло, вёсясько, озьы ик фарисейёс-
лэн но, нош Тынадьёсыз сиё но, юо но?» ³⁴Иисус
соослы шуэм: «Эмеспи пёлазы дырря, быгатйсь-
коды-а сюанчиосты визяса пукытыны?» ³⁵Но вуозы
нунальёс, кукке соос дорысь эмеспи басьтйськоз,
соку, со нунальёсы, соос визялозы но». ³⁶Иисус
соослы мадён верам: «Нокин но выль дйськут
бордысь жезыса вуж дйськут вылэ кышьет уг
пукты: уго соку со выльзэ жезёз, вужез борды но
вылез бордысь кышьет уз тупа. ³⁷Выль винаез но
нокин вужмем сепысьёсы уз лэзы, малы ке шуо-
но, выль вина сепысьёсыз кесёз но ачиз кисьтйсь-
коз, сепысьёсыз но арам луозы. ³⁸Выль винаез
выль сепысьёсы лэзыны кулэ; соку соиз но, таиз
но быдэс кылёзы. ³⁹Вуж винаез юэм бераз, но-
кинлэн но выль винаез юэмез уз поты, уго со
шуоз: "Вужез жечгес"».

6-тй ЛЮКЕТ

¹Одйгаз субботае Солы кизем ю бусы вамен по-тоно луэм, Солэн дышетскисьёсыз ю шепьёсты чигылллям но кынызы куадаса сииллям. ²Фарисейёс пöлысь куд-огез соослы шуиллям: «Малы субботае лэсьтыны ярантэм ужез лэсьтиськоды?» ³Иисус соослы ответ сётыса шуэм: «Öд лыдже шат, мар кариз Давид, кукке солэн аслаз но, соин ёош луэмьёслэн но кöтсы сюмаз? ⁴Кызы со Инмар корка пыриз но курбон нянез басьтйз, кудзэ священникьёслы сяна, нокинлы но сиыны уг яра вал, – ачиз но сииз, асэныз валче ветлйсьёслы но сётйз». ⁵Собере Иисус соослы шуэм: «Адями Пи субботалы но кузё луэ».

⁶Мукетаз субботае Иисус синагогае пырыса дышетыны кутскем. Отын бур кыиз куасьмем мурт вылэм. ⁷Иисусэз янгыше уськытон вылысь, книга тодйсьёс но фарисейёс Со съöрын чакласа улйллям: суббота нуналэ уз бурмыты-а? ⁸Соослэсь малпанзэс тодыса, кыиз куасьмем муртлы Иисус шуэм: «Султы, пот шораз». Со султэм, потэм. ⁹Соку Иисус соослы шуэм: «Тйлесьтыд Мон юало: суббота нуналэ мар лэсьтыны яра? Зеч уж, яке урод уж? Лулэз утыны яке быдтыны?» Соос шып улйллям. ¹⁰Ваньзы шоры учкем но со муртлы шуэм: «Кидэ шонер кар». Со озьы ик карем; кыиз мукетыз кадь ик йöн луэм. ¹¹Соос урмиллям, мар меда Иисусэн кароно шуыса, куспазы вераськиллям.

¹²Со нунальёсы Иисус гурезь йылэ вöсяськыны тубем, быдэс уй Инмарлы вöсяськыса улэм. ¹³Нунал вуэм бере, Аслэсьтыз дышетскисьёссэ Со өтем но соос пöлысь дас кыксэ быръем, соосты апостольёс шуыса нима: ¹⁴Симонэз, кудзэ Петр шуыса нима, солэсь вынзэ Андреез, Иаковез но Иоаннэз, Филиппез но Варфоломеез, ¹⁵Матфеез но Фомаез, Алфей Иаковез но Зилот шуон Симонэз, ¹⁶Иаков Иудаез но Искарот Иудаез. Таиз Инмар Пиез вузаса сётйсь луиз.

¹⁷Соосын чöш васькыса, Иисус чöшкыт интые султэм. Тросэз дышетскисьёсыз, озьы ик быдэс Иудеяысь но Иерусалимысь, зарезь котырысь Тир но Сидон ёросьёсысь лачак калык отын былэм. ¹⁸Сое кылзйськыны, висёнъёссылэсь йөнатскыны соос лыктйллям. Перияськем муртъёсты но Со бурмытылэм. ¹⁹Вань калык Со борды йөтйськыны тыршем, малы ке шуоно, Со бордысь кужым потыса ваньзэс бурмытъям.

²⁰Синъёссэ дышетскисьёсыз пала жутыса, Иисус шуэм:

«Покчи мылкыдоос шудоесь:

тйляд Инмар Эксэйлыкты вань.

²¹Али сютэм улйсьёс шудоесь:

тйляд кётты тыр луоз.

Али бөрдйсьёс шудоесь:

тй серекъялоды.

²²Шудоесь тй, кукке тйледыз Адями Пи понна адямиос аджонтэм каризы ке, кукке тйледыз люкизы ке, курлазы ке, нимдэс саптаса куштйзы

ке. ²³Шумпотэлэ со нуналэ, шулдырьяськелэ, уго Инмын басьтоно медды-кузьымды туж бадзым. Соослэн атайёссы но пророкъёсты тазы ик карылйзы.

²⁴Куректон-кайгу тиледлы, узырьёс!

Шумпотыса улондэс тй басьтйды ни.

²⁵Куректон-кайгу тиледлы, али тыр улйсьёс!

Сиемды потоз уго.

Куректон-кайгу тиледлы, али серекъяса улйсьёс!

Бёрдоды, виышъялоды ай.

²⁶Куректон-кайгу тиледлы, кукке вань адямиос тй сярысь ушъяса вералозы. Соослэн атайёссы озы каризы ёрекчи пророкъёсын.

²⁷Тйледлы, кылзйськисьёслы, верасько: тушмонъёстэс яратэлэ, тйледыз кётвеськантэм карисьёстылы жеч каре, ²⁸тйледыз каргасьёсты бакель каре, тйледыз ултйясьёс понна вёсяськелэ.

²⁹Бамад чабкись муртлы мукет палзэ но пукты. Выл дйсьтэ талась муртлы эн локеты дэремдэ но басьтыны. ³⁰Котькинлы, курись муртлы, сёт, тынэсьтыд басьтэм муртлэсь берен эн кур. ³¹Адямиослы озы лэсьтэ, кызы асьтэлы лэсьтэмзэс кулэ кариськоды. ³²Асьтэдыз яратйсьёсты яратйськоды ке, со понна тйледлы кыче берекет луоз!

Сьёлыкоос но уго соосты яратйсьёсты ярато. ³³Асьтэлы жеч лэсьтйсьёслы жеч лэсьтйськоды ке, со понна тйледлы кыче берекет? Сьёлыкоос но уго озы ик каро. ³⁴Пунэмен сётйськоды ке сычёослы, киньёслэсь окиськиськоды берен басьтыны, со понна кыче тйледлы берекет? Уго сьёлыкоос но сьёлыкоослы пунэмен сёто, берен

сомында ик басьтон вылысь. ³⁵Нош тй тушмонъестэс яратэлэ, зеч уж лэсьтэлэ, пунэмен сётэ, берен номыр но басьтыны малпатэк. Тйляд туж бадзым медды-кузьымды луоз, Вылысь Инмарлэн нылпиосыз луоды. Со уго тау карисьтэмъёслы но, лекъёслы но зеч. ³⁶Кыће тйляд Атайды жалясь сюлэмо, тй но жалясь сюлэмоесь луэлэ.

³⁷Судить эн каре, тй но судить каремын уд луэ. Эн курлалэ, тй но курламын уд луэ. Простить каре, тй но простить каремын луоды. ³⁸Сётэлэ, тйледлы но сётйськоз: тыр мертэтэн мертаса, сэзьяса, туйылыса, пачыл карыса тйледлы, тйляд кияды сётйськоз. Уго кыће мертэтэн мерталоуды, сычөөн ик тйледлы но мертаськоз». ³⁹Соослы мадён но верам: «Быгатэ-а синтэм мурт синтэмез валтыса нуыны? Кыксы ик гуэ уз усе-а? ⁴⁰Дышетскись дышетйсьезлэсь выльйынгес уз луы; пумен визь люкаса но дышетскись дышетйсьез кадь гинэ луоз. ⁴¹Малы тон мукет муртлэн синмысьтыз улзэ шоры учкиськод, нош аслад синмысьтыд корзэ но уд шөдйськы? ⁴²Яке, кызы тын мукет муртлы шуыны быгатод: "Братэ! Вай синмысьтыд улзэ потто", кукэ аслад синмысьтыд корзэ уд адзиськы? Чеберьяськись! Азьло аслад синмысьтыд корзэ потты, соку адзод, кызы мукет муртлэн синмысьтыз улзэ поттоно.

⁴³Зеч писпу урод емыш уг сёты; урод писпу но зеч емыш уг сёты. ⁴⁴Котькыче но писпуэз емышезья тодманы луэ, малы ке шуоно, смоква емышез тёрнпуысь уг бичало, виноградэз но емыш сётйсьтэм куакысь уг окто. ⁴⁵Зеч адями ас сюл-

мыслэн жеч шыкысысьтыз жечсэ поттэ, нош лек адыми сюлмыслэн лек шыкысысьтыз лексэ поттэ. Уго мар адымилэн сюлмаз, со ик солэн кыл вылаз.

⁴⁶Малы тй Мыным вазиськиськоды: ”Кузё-Инмаре! Кузё-Инмаре!”, нош асьтэос Мынэсьтым косэмме уд лэсьтиське? ⁴⁷Котькудйз Мон доры лыктйсь, Мынэсьтым кылме кылзйськись но соосты быдэсьясь мурт, тйледлы верало, кинлы со укша, – ⁴⁸гу гудзыса пыдло пырем но коркаез-лэсь иньетсэ из вылэ пунктэм муртлы со укша. Ву будыса та корка вылэ урдскем но, вырзйтэмез луымтэ, малы ке шуоно, со из вылэ пунктэмын вылэм. ⁴⁹Нош кылзйськись но быдэсьясьтэм адыми корказэ суй вылэ иньеттэк пунктэм муртлы укша. Корка вылэ ву урдскем но соку ик со куашкам; та коркалэн куашкамез туж шимес вылэм».

7-тй ЛЮКЕТ

¹Кылзйськисьёслы вань верано кылзэ вераса быдтэм бераз, Иисус Капернауме пырем. ²Огезлэн сю солдатъёсын кивалтйсьлэн яратоно ляльчиез кулоно кадъ ик висе вылэм. ³Иисус сярысь кылэм но, иудей тороосты Со доры, солэсь ляльчизэ лыктыса мед бурмытоз вал шуыса Солэсь курыны ыстэм. ⁴Иисус доры лыктыса, туж куриллям: «Тон солы мед юрттод шуыса, со ярамон, ⁵уго со асьмелэсь калыкмес яратэ, милемлы синагога но пунктйз». ⁶Иисус соосын жош мынэм. Коркалы матэ вуэм бераз, сю солдатэн кивалтйсь Иисус

доры эшъёссэ ыстэм Солы вераны: «Кузёе! Эн сюлэмшугьяськы. Тон мынам юртам мед пырод – мон ярамон адями өвөл. ⁷Соин ик асме ачим Тон доры мыныны ярамон адями өвөл шуыса лыдъяй. Кыл гинэ вера но, мынам ляльчие бурмоз. ⁸Мон уго ачим мурт ки улын ужась адями. Но мынам ки улам солдатъёс вань, огезлы шуисько: ”Мын”, – со мынэ; мукетызлы: ”Лыкты”, – со лыктэ. Ляльчиелы шуисько: ”Лэсьты сое”, – со лэсьтэ». ⁹Тае кылыса, Иисус паймем но сьöраз лыктйсьёслы шуэм: «Зэм ик тйледлы верасько: Израильысь но Мон öй шедьты таçe осконэз». ¹⁰Ыстэм муртъёс корказы берытскыку, ляльчи бурмемын вылэм ни.

¹¹Та бере Иисус Наин шуон каре мынэм. Соин ёош тросэз дышетскисьёсыз но туж уно калык мынйллям. ¹²Со кар капкалы матэ вуыку, кулэм муртэ потто вылэм. Анаезлэн со одйг гинэ пиез вылэм, анаез палкышно вылэм; трос калык келяськыса мынэм. ¹³Кузё-Инмар адзыса сое жалям но шуэм: «Эн бöрдь». ¹⁴Матаз лыктыса, кулэм мурт нуон маке борды йöтйськем; нуисьёс дугдйллям. Со шуэм: «Пияш! Тыныд верасько: султы». ¹⁵Кулэм пи жутйськыса пуксем но вераськыны кутскем; Иисус сое анаезлы сётэм. ¹⁶Ваньзы ик туж куалектйллям но Инмарез даньяса шуиллям: «Асьме күспысь быдзым пророк султйз. Инмар Ас калыкез доры вуылйз». ¹⁷Та сярись ивор быдэс Иудеяе, котыр ёросъёсы вöлмем.

¹⁸Та сярись дышетскисьёсыз ваньзэ Иоаннлы вераллям. ¹⁹Иоанн кыксэ дышетскисьёссэ öтем но

Иисус доры юаны ыстэм: «Тон-а Со, Кудйз лыктыны кулэ, яке милемлы мукетсэ-а витёно?»²⁰ Иисус доры лыктыса шуиллям: «Иоанн Пылатйсь милемыз Тон доры юаны ыстйз: ”Тон-а Со, Кудйз лыктыны кулэ, яке милемлы мукетсэ-а витёно?”»²¹ Нош та вадесын Со трос муртэ висёнъёссылэсь, курадзонъёссылэсь, периослэсь мозмытэм, трос синтэмъёслы адзон сётэм.²² Соослы ответ сётывса, Иисус шуэм: «Мар адзиды, кылйды, мынэлэ но Иоаннлы вералэ: синтэмъёс адзыны кутско, чутъёс ветло, гижло черен висисъёс чылкытало, пельтэмъёс кыло, кулэмъёс улзо, кураськисъёслы Зеч Ивор тодытйське.²³ Шудо со мурт, кинлэн Мыным осконэз уг быры». ²⁴Иоаннлэн ыстэм муртъёсыз кошкем бере, Иоанн сярысь калыклы вераны кутскем: «Кыр дуннее мае учкыны ветлйды? Төл шорын веттаськись камыш бодыез-а? ²⁵Мае бен учкыны ветлйды? Небыт дйськутэн дйсяськем адямиез-а? Небыт дуно дйськут нуллйсьёс, узыр улйсьёс эксэйёслэн юртазы уло. ²⁶Мае бен тй учкыны ветлйды? Пророкез-а? Тйледлы верасько: бен, пророклэсь но вылйысьсэгес. ²⁷Уго та со, кин сярысь гожтэмын:

”Тани Мон Тынад азьтйд

Аслэсьтым кылчинме лэзисько,

со Тынэсьтыд сюрестэ Тон азьтй дасялоз”.*

²⁸Тйледлы верасько: дунне вылэ вордйськемъёс пöлысь Иоанн Пылатйсьлэсь бадзымез одйг но пророк öвöл; нош Инмар Эксэйлыкын покчиез

* 7:27 Мал. 3:1.

но солэсь бадзымгес». ²⁹Сое кылзйськыса улэм вань калык, выт бичасьёс но, кудьёсыз Иоани дорын пылатйськизы, Инмарез данъяллям. ³⁰Нош фарисейёс но закон тодйсьёс, со дорын пылатйськытэк, Инмарлэсь соос понна чаклам эриксэ палэнтйллям.

³¹Соку Кузё-Инмар шуэм: «Та выжыысь адямиосты кинэн чошатов? Кинлы соос укшало?» ³²Соос укшало ульчаын пукись, ог-огзылы вазиськись нылпиослы, кинъёс шуо: "Ми тйледлы чипчирган шудймы, нош тй өд эктэ; ми тйледлы жо ж гуръёс кырзамы, нош тй өд бөрдэ". ³³Иоанн Пылатйсь лыктйз, нянь но уг сиы, вина но уг юы, но тй шуиськоды: "Со пушкын пери". ³⁴Адями Пи лыктйз, сие но, юэ но, но тй шуиськоды: "Таиз адями сиськыны, вина юыны яратэ, выт бичасьёслэн, сьöлыкоослэн эшсы со". ³⁵Инмар визьлыклен нылпиосыз Инмар визьлыклезь шонер луонзэ возматом.

³⁶Фарисейёс пöлысь одйгез Иисусэз дораз сиськыны өтем. Со фарисейлэн корказ пырыса пуксем. ³⁷Тани, та городысь одйг сьöлыко кышномурт Солэсь фарисей дорын сиськыса улэмзэ тодэм но алавастр посудает миро поныса ваем. ³⁸Бертйз, Солэн пыд дораз кариськем но бөрдыса, Солэсь пыдъёссэ синкылиен гылтэм, ас йырысьтыз йырсиеныз чушылыны кутскем. Солэсь пыдъёссэ чупам но мироен зырам. ³⁹Тае адзыса, Сое өтем фарисей ас понназ ачиз шуэм: «Со пророк ке луысал, тодысал – кин но кыче кышномурт Со борды йötйське, – сьöлыко мурт ук со». ⁴⁰Солы вазись-

кыса Иисус шуэм: «Симон! Мынам тыныд маке но веранэ вань». Со шуэм: «Вера, Дышетйсь». ⁴¹Иисус шуэм: «Одйг пунэм сёткасьлэн кык пунэм тыроно муртэз вылэм: огез вить сю динарий, нош мукетыз – витьтон. ⁴²Тырыны номырзы но өвö-лысь, кыксылэсь но тыронзэс куштэм. Вера, соос пöлысь кудзы сое юнгес яратоз?» ⁴³Симон ответ сётэм: «Малпасько, кудйзлэсь троссэгес куштйз». Со шуэм: «Шонер тон малпаськод». ⁴⁴Кышномурт пала берыктйськыса, Симонлы шуэм: «Адзиськод-а тон та кышномуртэз? Мон тынад коркад лыктй но, тон Мынам пыдам вудэ öд сёты, нош со Мынэсьтым пыдъёсме синкылиен гылтйз но йырысьтыз йырсиеныз чүшылйз. ⁴⁵Тон Монэ öд чупа, нош со Мон лыктэм дырысен уг дугды Мынэсьтым пыдъёсме чупамысь. ⁴⁶Тон Мынэсьтым йирме вöйын öд зыра, нош со Мынэсьтым пыдъёсме мироен зыраз. ⁴⁷Соин ик тыныд шуисько: трос яратэм понназ, солэн трос сьöлыкъёсыз куштйсько. Кинлы öжыт куштйське, со öжыт яратэ». ⁴⁸Кышномуртлы шуэм: «Тынад сьöлыкъёсыд куштйсько». ⁴⁹Соин чöш сиськисьёс асьсэ понна вераськыны кутскиллям: «Кин со, сьöлыкъёсты но куштэ?» ⁵⁰Нош Со кышномуртлы шуэм: «Осконэд тонэ утиз. Каньылэн мын».

8-тй ЛЮКЕТ

¹Собере Иисус, Инмар Эксэйлыкез тодытыса, Зеч Ивор вераса, городъестй, гуртъестй ветлэм.

Соин ёош дас кык дышетскисьёсыз ветлйллям,
²нош озыы ик куд-ог кышномуртъёс но Со съёрын
 ветлйллям, кудьёссэ Со периослэсь, висёнъёслэсь
 бурмытэм: Магдалина шуон Мария, кудйз пуш-
 кысь сизьым периос потйллям; ³Иродлэсь юртъер-
 зэ утыыса улйсь Хузалэн кышноез Иоанна, озыы
 ик Сусанна но трос мукетъёсыз. Соос Иисуслы
 асьсэлэн ваньбуренызы юрттйськыса улйллям.

⁴Трос калык люкаськем бере, вань городъёсысь
 калык Иисус котыре лыктэм. Со мадён пыр вера-
 ны кутскем: ⁵«Кизись кидыссэ кизыны потэм.
 Кизыкуз куд-огез сюрес дуре усем но лёгаськем,
 ин тылобурдоос кукчаллям сое. ⁶Куд-огез из вылэ
 усем, потэм но шуям, малы ке шуоно, мускытэз
 вылымтэ. ⁷Куд-огез бышкись будосьёс куспы усем,
 бышкись пуд будэм но жокатэм сое. ⁸Куд-огез зеч
 музьеме усем, – будэм но сю полэс емыш ваем». Тае
 верам берез, бадзым куараен ялэм: «Кылыны
 пельыз вань мурт, мед кылоз!»

⁹Дышетскисьёсыз Солэсь юаллям: «Та мадён мае
 возьматэ?» ¹⁰Со шуэм: «Тйледлы Инмар Эксэй-
 лыклэсь ватйськыса улйсь зэмлыксэ тодон сётэ-
 мын, нош мукетъёслы – мадёнъёс пыр, соин ик
 соос учко, – но уг адзо, кыло, – но уг валало.
¹¹Тани мае та мадён возьматэ: кидыс – со Ин-
 марлэн кылыз. ¹²Сюрес кузя усемез – со сыче
 кылзйсьёс, кинъёс доры бёрысь дьявол лыктэ но,
 медаз оске, медаз утиське шуыса, соослэн сюл-
 мысьтызы Инмар кылэз нуэ. ¹³Из вылэ усемез –
 со сычеос, кинъёс кылэз кыло но шумпотыса ка-
 был басьто, но выжызы өвёл: огдырын оско, нош

визь сынаськон вуэ ке, усё. ¹⁴Бышкись будосьёс пöлы усемез – со сыёеос, кинёс кылэз кылзо, но сюлмаськонёсын, узырлыкен, майбырьяськыса улонэн нюртйсько, соин ик емыш уг ваё. ¹⁵Нош зеч музьеме усемез – со сыёеос, кинёс Инмар кылэз кыло но лякыт, чылкыт сюлмазы возё, чиданэнызы емыш ваё». Тае верам но бадзым куараен шуэм: «Кылыны пельыз вань мурт мед кылоз!

¹⁶Нокин но сюсьтылэз жуатыса посудаен уг шобырты яке кровать улэ уг пукты, пырисьёс югытэз мед адзозы шуыса, сюсьтыл пуктонэ пукто. ¹⁷Уго öвöл нокыёе но лушкем маке, кудйз шарае потытэк уг кылы, нокыёе ватйськемлэн но тодмо луйтэк, шарае потытэк кылемез уг луы. ¹⁸Чаклалэ, мае тй кылзйськоды, уго кинлэн вань, солы сётэмын луоз; кинлэн öвöл, солэн, мае вань карыны малпа, соиз но басьтйськоз».

¹⁹Иисус доры Анаез, братёсыз лыктйллям но калык тросысь Со доры пырыны быгатйллямтэ. ²⁰Солы ивортйллям: «Анаед но братёсыд, Тонэ адземзы потыса, педлон сыло». ²¹Соослы ответ сётыса, Иисус шуэм: «Мынам анае, Мынам братёсы соос, кинёс Инмар кылэз кылзо но сое быдэсьяло».

²²Одйг нуналэ Иисус дышетскисьёсыныз ёош пыже пырем но соослы шуэм: «Зарезьлэн огпалаз выжоме». Собере соос кошкйллям. ²³Уякузы Со умме усем. Зарезь вылын кужмо төл жутскем но соосты тулкымен пылатьяны кутскем, соос секыт учыре сюрйллям. ²⁴Дораз лыктыса, Сое сайка-тйллям но шуйллям: «Дышетйсь! Дышетйсь! Бы-

риськомы». Нош Со султгыса, төллы но вулэн тулкымъяськонэзлы алыса верам. Соку төл дугдэм, ву вылын чус луэм. ²⁵Собере дышеткисьёсызлы Иисус шуэм: «Кытын тйляд осконды?» Нош соос кышкаса но паймыса огзылы огзы вераллям: «Кин та, төллы но, вулы но косыса вера но, соос Солэсь кылзйсько?»

²⁶Галилеялы ваче пумитэ интыяськем Гадара шаере вуиллям. ²⁷Ярдуре потэм бераз, городысь кемалась дырысен периосын ёртэм, дйськут дйсятэк, коркан улытэк, шайгу пещераосын улйсь одйг адыми Сое пумитам. ²⁸Иисусэз адзыса черектйськем но Со азе уськытйськыса бадзым куараен верам: «Иисус, Вылысь Инмарлэн Пиез, Тынад мон бордын мар ужд? Тэльмырыса Тонэ курисько, эн курадзыты монэ». ²⁹Уго Иисус перилы та адыми пушкысь потыны косэм, малы ке шуоно, со кема дыр ёже сое курадзытыса возем. Сое утён понна, думылыса, жильыяса возиллям. Нош со думетьёсты тйяллям, пери сое кыр дуннеосы улляса нуллэм. ³⁰Иисус солэсь юам: «Кызьы тынад нимыд?» Со шуэм: «Легион», малы ке шуоно, со пушкы трос периос пыремын вылэм. ³¹Пыдэстэм гуэ соосты медаз улля вал шуыса, соос Иисусэз куриллям.

³²Татын ик гурезьын бадзым парсь уллё возьмаське вылэм. Периос Сое куриллям, соос пушкы пырыны мед лэзёз вал шуыса. Соосты Со парсьёс пушкы пырыны лэзем. ³³Адыми пушкысь потыса, периос парсьёслэн пушказы пыриллям; соку парсь уллё мең ярысен зарезе тэтчам но выем. ³⁴Мар

луэмез адзыса, парсь возмасьёс бызбыса кош-
киллям, городын но, гуртъёсын но та сярысь ивор-
тйллям. ³⁵Луэм учырез адзыны потйллям. Иисус
доры лыктыса аджиллям Иисуслэн пьд выжыяз
дйсяськыса, визьмын пукись адямиез, кудйз пуш-
кысь периос потйллям. Соос туж куалектйллям.
³⁶Адзисьёс соослы вераллям перияськем муртлэсь
кызы бурмемзэ. ³⁷Гадара ёросысь вань калык
Иисусэз дорысьтызы кошкыны курем, малы ке
шуоно, соосты туж бадзым куалектон ёртэм. Со
пыже пырем но берытскем. ³⁸Периосыз потэм
мурт Иисусэз курем Соин огазын луыны. Нош
Иисус сое бертыны косэм но шуэм: ³⁹«Аслад дорад
берт но вера, мар тыныд Инмар лэсьтйз». Со
мынэм но быдэс городэтй Иисуслэсь соин мар
каремзэ тодытыса ветлэм.

⁴⁰Иисус берытскем бере, калык Сое зеч пумитам,
уго ваньзы Сое возмало вылэм. ⁴¹Соку синагога-
лэн Иаир нимо йырыз лыктэм. Иисуслэн аяз пы-
десьяськыса, Сое аслаз корказ пырыны курем, –
⁴²солэн ог дас кык аресьем одйг гинэ нылыз вы-
лэм, со но кулоно кадь черлам. Со мыныку, калык
Сое жиптэм. ⁴³Соку вирыз кошкыса дас кык ар
чоже курадзыса ульсь кышномурт, кудйз вань
юртъерзэ врачёслы тырыны быдтэм, нош йона-
тыны огез но сое быгатымтэ, ⁴⁴бертйз лыктыса,
Иисуслэн дйсянэзлэн сёзы бордаз йөтйськем. Со
куспын ик вирыз виямысь дугдэм. ⁴⁵Иисус шуэм:
«Кин Мон борды йөтйськиз?» Кукке ваньзы өм
шуиллям, Петр но Соин чош луэмьёс вераллям:
«Дышетйсь! Калык Тонэ котыртэ, жиптэ, нош Тон
шуиськод: Кин Мон борды йөтйськиз?» ⁴⁶Соку

Иисус шуэм: «Кин ке но Мон борды йөтйськиз. Мон шөдй пушкысьтым кужымлэсь потэмзэ». ⁴⁷Ватыны луымтээ адзыса, кышномурт куалектыса лыктэм но, Со азе пидесьяськыса, вань калык азын Со лы ялэм, кыче муген Со борды йөтйськиз но кызы со куспын ик бурмиз. ⁴⁸Иисус шуэм: «Сэзь лу, нылмурт! Осконэд тонэ утиз. Каньылэн мын».

⁴⁹Тае веран куспетйз, кин ке но синагогалэн кузеез дорысь лыктэм но солы шуэм: «Нылыд кулйз. Эн ни раньзыты дышетйсез». ⁵⁰Та кыльёсыз кылыса, Иисус солы шуэм: «Эн кышка, оскы гинэ, утемын луоз». ⁵¹Корказы вуыса, Петрез, Иоаннэз, Иаковез но ныллэсь атаеныз анайзэ сяна, нокинэ но бөрсязы пырыны лэзьымтэ. ⁵²Со ныл понна ваньзы бөрдйллям, виышъяллям, нош Иисус шуэм: «Эн бөрдэ, со кулэмын өвөл, со изе гинэ». ⁵³Ныллэсь кулэмзэ тодыса, Сое серем кариллям. ⁵⁴Нош Со ваньзэс педло поттэм но, китйз кутыса, бадзымен верам: «Нылаш! Султы». ⁵⁵Ныллэн лулыз берытскем; соку ик со султэм. Иисус солы сиён сётыны косэм. ⁵⁶Анай-атайёсыз паймиллям. Нош Иисус та луэм учыр сярысь нокинлы но вераны косымтэ.

9-тй ЛЮКЕТ

¹Дас кыкэз ик дышетскисьёссэ өтем но вань периосты поттаны, висёнъёсты бурмытъяны соослы кужым но эрик сётэм, ²соосты Инмар Эксэйлыкез

тодытыны, висисъёсты йөнатыны ыстэм. ³Соослы шуэм: «Сюрес вылэ номыр но эн басьтэ: боды но, пуйы но, нянь но, азвесь но, кык пумо дйсь-кутты но медаз луы. ⁴Кыче корка пыриды, отчы кыле, отысен сюрес вылэ потэ. ⁵Өз ке пыртэ тйледыз, соку со городысь потыкуды, соослэсь янгышъёссэс шарае поттон понна, пыдысьтыды суюзэ курткыса кельтэ». ⁶Соос мынйллям но, гуртъёстй Зеч Ивор вераса, котькытй но йөнатыса ветлйллям.

⁷Нъылетй люкетыныз кивалтйсь Ирод ваньмыз сярись, мар лэсьтэ Иисус, кылэм но абдрам: уго огъёсыз верало вылэм со, пе, Иоанн кулэмысь улзем, ⁸мукетъёсыз – Илия лыктэм, нош куд-огъёсыз шуиллям вашкала пророкъёс пöлысь одйгез, пе, улзем. ⁹Ирод шуэм: «Иоаннлэсь йырзэ чогытй. Кин бен Со, Кин сярись мон таче ивор кылйсько?» Сое адзыны турттыса Сое утчам.

¹⁰Апостольёс берытскыса, Иисуслы мар лэсьтэмзы сярись вераллям. Соосты Со съöраз басьтэм но Вифсаида шуон городлы матысь чик калыктэм интые кошкем. ¹¹Нош калык тодэм но Иисус бöрсьы мынэм. Соосты Со бордаз кутэм но Инмар Эксэйлык сярись соослы верам, йөнатьяны курисъёсты йөнатьям. ¹²Нунал жыт пала кыстйськыны кутскем. Со доры лыктыса, дас кык дышетскисьёсыз Сола вераллям: «Калыкез артысь починкаосы но гуртъёсы кöлыны, сиён утчаны лэзь, уго асьмеос кыр интыын». ¹³Нош Иисус соослы шуэм: «Тй соослы сиён сётэлэ». Соос шуиллям: «Милям вить няньмы но кык чорыгмы сяна номырмы но

өвөл. Вань калыклы мыныса сиён басьтоно кешат?»¹⁴Соос ог вить сюрс кузя вылэм. Со дышетскисьёсызлы шуэм: «Пуктэлэ соосты витьтон муртэн, чурен-чурен». ¹⁵Озыы кариллям, ваньзэс пуктылйллям. ¹⁶Нош Иисус вить нянез но кык чорыгез басьтыса, инме учкем, соосты бакель карем, тйялтэм но, калыклы мед люкылозы шуыса, дышетскисьёсызлы сётэм. ¹⁷Сииллям, ваньзылэн кётсы тырем. Соос бере кылем юдэсьёсты дас кык кудые тыраз бичаллям.

¹⁸Одйг пол, шыпыт интыын вёсяськыса улыкуз, бордаз дышетскисьёсыз вылэм, соослэсь Со юам: «Калык Монэ кин шуыса лыдья?» ¹⁹Соос ответ сётыса шуиллям: «Иоанн Пылатйсь, куд-огез Илия шуэ; мукетъёсыз шуо вашкала пророкъёс пöлысь, пе, одйгез улзем». ²⁰Соослэсь Иисус юам: «Нош тй Монэ кин шуыса лыдьяськоды?» Петр ответ сётыса шуэм: «Инмарлэн Христосэз шуыса».

²¹Та сярись нокинлы но медаз вералэ шуыса, соосты юн алэм. ²²Верам, Адыми Пилы трос курадзонэз чиданы кулэ луоз, төроос, архиерейёс, книга тодйсьёс Сое палэнтозы, Со виемын луоз, куинетй нуналаз улзыса султоз шуыса. ²³Нош ваньмызлы шуэм: «Кин Мон съöры мыныны турттэ, аслэсьтыд ачид куштйськы, киростэ басьты но Мон бöрсьы мын. ²⁴Уго кинлэн лулзэ утемез потэ, со сое ыштоз, нош кин Мон понна лулзэ ыштоз – со лулзэ утёз. ²⁵Адымилы мар пайдаез быдэс дуннеез аслыз басьтйз ке, нош ачиз быриз яке аслыз изъян лэсьтйз ке? ²⁶Уго кин Мынэсьтым, Мынам кыльёсылэсь возьдаськыз ке, Аслаз данэныз, Атаезлэн,

святой кылчинъёслэн данэнызы лыктыкуз, солэсь Адями Пи но возьдаськоз. ²⁷Зэм ик тйледлы верасько: татын сылйсьёс пöлын вань куд-огез, кинъёс кулонэз тодыса уз вуз, кызыы Инмар Эксэйлыкез адзозы».

²⁸Та кыльёс бере, ог тямьс нунал ортчыса, Петрез, Иоаннэз но Иаковез басьтыса, Иисус вöсяськыны гурезе тубем. ²⁹Вöсяськыкуз Солэн ымнырыз воштйськем, дйськутэз пиштйсь тöды луэм. ³⁰Тани кык пиосмуртъёс Соин вераськыса уйллям, со Моисеен Илия вылэм. ³¹Данлыкен лыктыса, Солэн кошконэз сярысь вераськиллям, кудзэ Со Иерусалимын быдэстыны кулэ луоз. ³²Петрез но соин ёош луэмъёсты ум нуртыса возем. Сайкаллям но Солэсь пиштйсь данлыксэ, Соин огазын сылйсь кык пиосмуртъёсты аджиллям. ³³Соос дорысь кошкыкузы, Петр Иисуслы шуэм: «Дышетйсь! Милемлы татын улыны жеч; куинь тылыс пуктом, одйгзэ Тыныд, одйгзэ Моисейлы, одйгзэ Илиялы», – мар верамзэ валатэк. ³⁴Тае веракуз, пилем лыктэм но соосты шобыртэм; пилем пушкы пырем беразы кышкатскиллям. ³⁵Пилем пушкысь куара кылйськем, кудйз шуэм: «Та Мынам Яратоно Пие; кылзйське Солэсь». ³⁶Та куара бере, Иисус огназ кылем. Нош соос шып уйллям, со нунальёсы ма адземзы сярысь нокинлы но вераллямтэ.

³⁷Мукет нуналаз, гурезысь васькем беразы, Иисусэз трос калык пумитам. ³⁸Шöдтэк шорысь калык пöлысен кин ке но черектйськем: «Дышетйсь! Тэльмырыса Тонэ пиме учкыны курисько, со мы-

нам одйг гинэ: ³⁹Сое пери кутэ но, соку ик со черектйське, курадзытэ сое, шукыез ик вия; кать-тэммытэм бераз гинэ, мырдэм со дорысь кошке. ⁴⁰Тынэсьтыд дышетскисьёстэ кури вал перизэ поттыны; нош соос өз быгатэ». ⁴¹Иисус ответ сётыса шуэм: «Эй, оскисьтэм, азэм выжы! Кема уло на-а тй пöлын, кема чидало на-а тйледыз? Вай татчы пидэ». ⁴²Со лыктэ вылэм ай, нош пери сое уськытэм но тышканы кутскем. Иисус периез алэм но пинал пиез йöнатэм, сое атаез кие сётэм. ⁴³Ин-марлэн быдзымлыкезлы ваньзы паймыса улыл-лям. Ваньзы соос Иисуслэн вань лэсьтэмьёсызлы паймыса улыку, Со дышетскисьёсызлы шуэм: ⁴⁴«Пеляды понэ та кыльёсыз: Аядми Пи аядмиос кие сётэмын луоз». ⁴⁵Но та верам кылэз соос валлаллянтэ; уго сое медаз валалэ шуыса соослэсь со ватйськемын вылэм. Нош Солэсь со кыл сярысь юаны кышкаллям.

⁴⁶Соослэн сюлмазы малпан лыктэм: кин меда луысал соос пöлысь бадзымез? ⁴⁷Иисус, соослэсь сюлэм малпанзэс тодыса, пичи пиналэз кутэм но Аслаз аяз султытэм. ⁴⁸Собере соослы шуэм: «Кин Мынам нимыным та пиналэз кабыл басьтйз, со Монэ кабыл басьтэ; нош кин Монэ кабыл басьтэ, со Монэ Ыстйсез кабыл басьтэ. Уго тй пöлысь кин ваньмызлэсь покчи, со ваньмызлэсь быдзым луоз».

⁴⁹Соку Иоанн шуэм: «Дышетйсь! Тынад нимы-ныд периосты улясь аядмиез ми адзимы, но öм ни лэзе со ужез быдэсьяны, малы ке шуоно, со милемын уг ветлы». ⁵⁰Иисус солы шуэм: «Эн алэ; уго кин тйледлы пумит öвöл, со – тй палан».

⁵¹Дунне вылысь басьтйськон нунальёсыз матэ вуыны кутскем бере, Иисус Иерусалиме мыныны потэм. ⁵²Аслаз аяз ивортйсьёсты лэзем. Соос мынйллям но самарян гуртэ пыриллям, – Солы ваньзэ дасян понна. ⁵³Но отын Сое кабыл басьтйллямтэ, малы ке шуоно, Солэн вылтусыз Иерусалиме мынйсь муртлэн кадь вылэм. ⁵⁴Тае адзыса, дышетскисьёсыз Иаков но Иоанн шуиллям: «Кузё-Инмаре! Кулэ-а Тыныд, ми вералом, Инмысь тыл мед васькоз но соосты мед быдтоз шуыса, кызьы Илия лэсьтйз вал?» ⁵⁵Нош Иисус, соос пала берытскыса, соосты алэм но шуэм: «Уд тодйське, кыче духен тй. ⁵⁶Уго Аядми Пи аядми лутьёсты быдтыны өз лыкты, утьыны Со лыктйз». Отысен соос мукет гуртэ кошкыллям.

⁵⁷Луэм озьы: сюрес вылын дыръязы кин ке но Солы шуэм: «Кузёе! Кытчы гинэ Тон уд мыны, мон Тон съёры мыно». ⁵⁸Иисус солы шуэм: «Зичюслэн гутёзы вань, ин тылобурдоослэн – карзы; нош Аядми Пилэн йырзэ понон интыез но өвёл». ⁵⁹Мукетызлы аядмилы Со шуэм: «Мон съёры мын». Соиз шуэм: «Кузёе! Азьло лэзь монэ аслэсьтым атайме ватыны мыныны». ⁶⁰Иисус солы шуэм: «Асьсэлэсь кулэмъёссэс кулэмъёс мед ватозы, нош тон мын но Инмар Эксэйлык сярысь Зеч Иворез тодытыса ветлы». ⁶¹Эшшо мукетыз аядми Со-лы шуэм: «Мон Тон съёры мыно, Кузёе! Но азь-выл лэзь монэ гуртоосыным люкиськыны». ⁶²Иисус солы шуэм: «Нокудйз но геры вылэ кизэ понэм но берланяз утчаськись мурт Инмар Эксэйлыклы оскиськымон аядми уг луы».

10-тй ЛЮКЕТ

¹Та бере Кузё-Инмар мукетъёссэ сизьымдон дышетскисьёссэ быръем но кыкен-кыкен Аслаз азьтйз пöртэм городъёсы но интыосы ыстэм, кытчы Солэн Аслаз мынэмез потэм. ²Соослы шуэм: «Аран трос, нош ужасьёс öжыт; соин ик аранлэн Кузё-Инмарезлэсь вöсяськыса куре, Аслаз араназ ужасьёсты мед ыстоз шуыса. ³Мынэлэ! Мон тйледыз ыжпиосты кионъёс пöлы ыстэм кадь ыстйсько. ⁴Пуйы но, сумка но, пыдкучан но эн басьтэ, сюрес вылысен нокинэн но зечъяськыса эн улэ. ⁵Кыче ке корка пыриды, нырысь ик шуэлэ: "Каньыллык та коркалы!" ⁶Отын каньыллык улонэз кулэ карись вань ке, соку со вылэ тйляд каньыллыкты васькоз; öвöл ке, соку тй доры ик берыктйськоз. ⁷Со коркан ик улэ, марзы вань, сие, юз: уго ужась мурт ужомез понна кöттыр басьтыны кулэ. Коркась корка потаса эн ветлэ. ⁸Кыче ке городэ лыктйды но, пыртйзы ке, мар чектйзы, сиелэ. ⁹Отын кыллись висисьёсты бурмытъялэ но шуэлэ: "Инмар Эксэйлык тйледлы матэктйз". ¹⁰Кыче ке городэ лыктйды но, öз ке пыртэ тйледыз, ульчае потыса шуэлэ: ¹¹"Городысьтыды ми борды лякиськем сюз тйледлы курткиськом; но тодэлэ, Инмар Эксэйлык тйледлы матэктйз шуыса". ¹²Тйледлы верасько: самой со нуналэ Содомлы та городлы сярысь капчигес луоз.

¹³Кайгу тыныд, Хоразин! Кайгу тыныд, Вифсаида! Тй дорын возматэм паймымон ужъёс Тирын но Сидонын возматэмын луысалзы ке, соос

кемалась ини өбкельыса сьöлыкьёссылэсь куштйськысалзы, чурыт бышкись дйсь дйсясалзы, пень вылын пукысалзы. ¹⁴Тирлы но, Сидонлы но, тйледлы сярысь, судын капчигес луоз. ¹⁵Тон но, инбамозь жутйськем Капернаум, адэ куштйськод. ¹⁶Тйледыз кылзйськись мурт, Монэ кылзйське; тйлесьтыд куштйськись мурт, Мынэсьтым куштйське. Нош Мынэсьтым куштйськись мурт, Монэ Ыстйсьлэсь куштйське».

¹⁷Сизьымдон дышетскисьёс шумпотыса берытскиллям но шуиллям: «Кузё-Инмармы! Тынад нимыныд периос но милесьтым кылзйсько». ¹⁸Нош Иисус соослы шуэм: «Чилектэм кадь, инмысь усись шайтанэз Мон адзи. ¹⁹Тани, тйледлы кыйёс вылэ, скорпионьёс, вань тушмон кужым вылэ лёгиськыны эрик сётйсько, номыр но тйледлы изьян уз лэсьты. ²⁰Нош тй, периос тйлесьтыд кылзйсько шуыса, шум эн потэ, – шумпотэлэ, тйляд нимьёсты Инмын гожтйськемын шуыса».

²¹Со дыре ик Иисус духеныз шумпотыса шуэм: «Даньясько Тонэ, Атае, Инлэн но, музьемлэн но Кузё-Инмарез, тае Тон визьмоослэсь, нодоослэсь ватэмед но нуныослы усьтэмед понна. Атае! Сыёе вылэм уго Тынад зеч эрикед». ²²Дышетскисьёсыз пала берыктйськыса шуэм: «Атае Мыным ваньзэ сётйз. Кин со Пи, – Атай сяна, нокин но уг тоды, но кин со Атай, – Пи сяна, нокин но уг тоды, но эшшо тодэ со, кинлы Пилэн усьтэмез потэ». ²³Дышетскисьёсыз пала берыктйськыса, соослы нимысьтыз верам на: «Шудоесь синьёс, кудьёсыз адзо тйлесьтыд адземдэс! ²⁴Тйледлы верасько:

трос пророкѣс но эксэйѣс тїлесьтыд адѣемдэс адѣемзы потэ вал, но өз адѣе, тїлесьтыд кылэмдэс кылэмзы потэ вал, но өз кылэ».

²⁵Тани, султэм одйг закон тодйсь но Солэсь визь-зэ сынаса шуэм: «Дышетйсь! Быронтэм улонэз басьтон понна, мон ма карыны кулэ?» ²⁶Иисус солы шуэм: «Мар гожтэмын законын? Кызбы лыдзиськод?» ²⁷Ответ сётыса, со шуэм: «Кузё-Инмарез, аслэсьтыд Инмардэ, вань сюлмыныд, вань лулыныд, вань кужмыныд, вань визьмыныд яраты, матысьтэ но астэ ачид кадь ик». ²⁸Иисус солы шуэм: «Шонер ответ тон сётйд. Озы лэсьты, улэп луод». ²⁹Нош со, ассэ ачиз шонере поттыны турттыса, Иисуслы шуэм: «Нош кин бен мынам матысе?» ³⁰Талы Иисус шуэм: «Кыче ке но адями Иерусалимысь Иерихонэ мынэ вылэм но адями таласьѣс кие шедем, кудьѣсыз солэсь дйськутсэ октыса, ассэ жугыса, мырдэм улэп кельтыса кош-киллям. ³¹Учырам озы: со сюрес кузя священник мынэ вылэм но, сое адзыса, вөзтйз кошкем. ³²Озы ик со интыын левит но вылэм, дораз мыныса учкем но вөзтйз кошкем. ³³Кыче ке но Самария мурт кошкыкуз со шоры кемдэм, адзем сое но жаль потэм. ³⁴Дораз лыктыса, яраоссэ вөйын зыраса, винаен гылтыса бинем. Ишак вылаз пуктыса, кунокуае ваем но со сярись сюлмаськем. ³⁵Мукет нуналаз кошкыкуз кунокуа кузёлы кык динарий коньдон поттыса сётэм но солы шуэм: "Сюлмаськы со сярись. Талэсь тросгес коньдон быдтйд ке, берен вуи ке, тыныд тыро". ³⁶Кызбы малпаськод, кудйз та куинь муртъѣс пöлысь адями таласьѣс

кие шедемлы матысь луэ?»³⁷Со шуэм: «Кин солы зеч кариз». Соку Иисус солы шуэм: «Мын, тон но озьы ик лэсьты».

³⁸Сюрес кузя мынон сяменызы, Иисус одйгаз гуртэ вуэм. Татын Марфа нимо кышномурт Сое аслаз корказ өтем. ³⁹Солэн Мария нимо сузэрэз вылэм, со Иисуслэн пыд выжыяз пуксем но Солэсь верамзэ кылзйськыса улэм. ⁴⁰Нош Марфа трос сиён-юон дасяса Сое куно карон сярись сьулмаськем. Собере Иисуслэн матаз лыктыса шуэм: «Кузё-Инмаре! Сузэре монэ огнаме ужаны кельтйз шуыса, Тыныд нокыче но уг поты шат? Вера солы, мыным мед юрттоз». ⁴¹Нош Марфалы ответ сётыса, Иисус шуэм: «Марфа, Марфа! Тон тросэз сярись сьулмаськиськод, шугьяськиськод. ⁴²нош кулэ огез гинэ. Мария зечсэ люкетэз бырйиз, кудйз солэсь уз басьтйськы».

11-тй ЛЮКЕТ

¹Луэм озьы: одйг интыын вöсяськыса дугдэм бераз, дышеткисьёсыз пöлысь одйгез Иисуслы шуэм: «Кузё-Инмаре! Дышеты милемыз вöсяськыны, кызы Иоанн аслэсьтыз дышеткисьёссэ дышетйз». ²Соослы Со шуэм: «Вöсяськыкуды вералэ:

”Инмысь Атаймы!

Тынад нимыд дано мед луоз;

Тынад Эксэйлыкед мед лыктоз;

Тынад эрикедья мед луоз музьем вылын но,
инмын кадь ик;

³Милемлы туннэ улымон няньмес сёты;

⁴Милесьтым съёлыкьёсмес но кушты,
милемлы вань пунэмо луйсьёслэсь
ми но куштйськом уго;

милемыз визь сынаськонлэсь но уты,
уродлэсь но мозмыты милемыз”».

⁵Но соослы шуэм: «Кин ке но тй пёлысь, кудйз-
лэн эшез вань, уйшор уин со доры лыктоз но
солы шуоз: ”Эше! Вай мыным пунэмен куинь
няньдэ. ⁶Мон доры сюрес вылысь эше пыриз, нош
мынам солы чектыны номыри но өвёл”. ⁷Нош
соиз пуш паласен солы ответ сётыса шуоз: ”Эн
раньзыты монэ, өсьёс чогамын ни, нылпиосы но
монэн огазын валесын кыллэ, уг быгатйськы
султыса тыныд нянь сётыны”. ⁸Тйледлы верасько,
эш луыса вылысь но султыса өз ке сёты, соиз
куремысь өз ке дугды, султоз но кёня куре, сомын-
да сётоз. ⁹Мон тйледлы верало: курелэ, тйледлы
сётэмын луоз; утчалэ – шедьтоды; йыгаське – тй-
ледлы усьтозы. ¹⁰Уго котькудйз курись мурт бась-
тэ, утчась – шедьтэ, йыгаськисьлы – усьтозы. ¹¹Кы-
че тйлесьтыд атай, куке пиед нянь куроно, нош
тон солы из сётйд ке? Яке, чорыг куроно, чорыг
интые тон солы кый сётйд ке? ¹²Яке, курег пуз
куроно, тон солы скорпион сётйд ке? ¹³Озыен,
тй, лекесь луыса но, асьтэлэн нылпиостылы жечесь
кузьымьёс сётканы быгатйськоды ке, Инмысь
Атайды уката ик Солэсь курисьёслы Святой Духез
сётоз».

¹⁴Одйг пол Иисус кылтэм периез уल्या поттэм.
Пери потэм бере, кылтэм вераськыны куткем.
Калык паймем. ¹⁵Соос пёлысь куд-огез верась-

киллям, Со периосты периослэн эксэйзылэн веельзевуллэн кужыменыз улля шуыса. ¹⁶Нош мукетьёсыз, визьзэ сынаса, инмысь тодметъёс мед возматоз шуыса, Солэсь куриллям. ¹⁷Нош Иисус, таослэсь малпанъёссэс тодыса, соослы шуэм: «Котькыче но эксэйлык аслыз ачиз пумит люкиськиз ке, тырттэм кылёз, корка но аслыз ачиз пумит люкиськыз ке, куашкалоз. ¹⁸Шайтан но аслыз ачиз пумит люкиськем ке, кызыы солэн эксэйлыкез быдэс сылоз? Нош тй шуиськоды, Мон периосты веельзевуллэн кужыменыз уллясько шуыса. ¹⁹Мон периосты веельзевуллэн кужыменыз поттасько ке, нош тйляд пиосты кинлэн кужыменыз соосты улляло? Соин ик соос тйледлы судья луозы. ²⁰Инмар чиньыен Мон периосты поттасько ке, озьыен, тй доры Инмар Эксэйлык вуиз. ²¹Кужмо мурт корказэ пычалэн возьма ке, со юртлы кышкытлык өвёл. ²²Нош кукке со вылэ солэсь кужмоез урдскиз но vormиз ке сое, соку солэсь вань пычал тйрлыксэ басьтоз, кудйз вылэ со оскиськыса улйз вал, нош собере солэсь лушкам ваньбурзэ кызыы мылыз потэ, озьы люкылоз. ²³Кин Монэн өвёл, со Мыным пумит; кин Монэн огазын уг бича, со арамсюрам каре.

²⁴Адями пушкысь пери потэ ке, со вутэм интыостй, шыпыт улон инты утчаса ветлэ но шедьтытэк шуэ: ”Берытско аслам коркам, кытысь потй”. ²⁵Лыктэ но адже: со чужемын, утялтэмын. ²⁶Соку мынэ но ас бордаз мукетьёссэ, аслэсьтыз но лекесьёссэ, сизьым периосты басьтэ. Соос отчы пыро но отын уло. Соку адямины, нырысетйез сярысь, берпуметйез эшшо но уродгес луэ».

²⁷Тае веран куспетйз, калык пöлысь одйг кыш-номурт бадзым куараен Солы шуэм: «Шудо Тонэ нулйсь мугорпуш, Тонэ сюдйсь ноныос!» ²⁸Нош Иисус шуэм: «Шудоесь Инмарлэсь кылзэ кылзйсьёс, сое быдэсьясьёс».

²⁹Калык тросэн люкаськыны кутскем бере, Иисус вераны кутскем: «Та – кескич выжы. Со тодметъёс утча, но Иона пророклэн паймымон тодметэз сяна, солы мукет тодмет уз сётйськы. ³⁰Кызбы Иона Ниневия калык понна паймымон тодмет луэм, Адами Пи но та ёзлы-выжылы озы ик луоз. ³¹Лымшорысь нылкышно эксэй та ёзлы-выжылы пумит судэ султоз но соосты янгыш кароз, уго со дуннелэн пумысьтыз Соломонлэсь визьмо веранъёссэ кылзыны лыктэм. Но тани, татын Соломонлэсь бадзымез. ³²Ниневия карын улйсьёс та выжылы пумит судэ султозы но сое янгыш карозы, уго соос, Ионалэн тодытонэз пыр öбкельыса, сьöлыкъёссылэсь куштйськиллям. Но тани, татын Ионалэсь бадзымез.

³³Нокин но сюсьтылэз жуатыса лушкем интые, посуда улэ но уг пукты. Пырисьёс югытэз мед адзозы шуыса, сюсьтыл пуктонэ пуктэ. ³⁴Мугорлэн югдытйсьез син луэ. Озыен, синмыд чылкыт ке луиз, быдэс мугорыд югыт луоз; нош со урод ке луиз, соку мугорыд но пеймыт луоз. ³⁵Озыен, учкы: югыт, кудйз тон пушкын, – öвöл-а пеймытлык? ³⁶Быдэс мугорыд югыт ке, öвöл ке одйг но пеймыт люкетэз, со быдэс югыт пиштыса улоз, лампадалэн тонэ пиштыса югдытэмез кадь ик».

³⁷Тае вераса улыкуз, одйг фарисей Сое гуртаз нуназе карыны öтем. Со лыктэм но жöк сьöры

пуксем. ³⁸Сиськон азын Иисус кизэ өз миськы шуыса, фарисей паймем. ³⁹Но Кузё-Инмар солы шуэм: «Али тй, фарисейёс, тэркылзэсь, тусьтылзэсь педпалзэ сузяськоды, нош асьтэлэн пушъёсты лушкаськонэн, кескич улонэн тырмемын. ⁴⁰Нодтэмъёс! Кин педпалзэ кылдытйз, Со ик пуш палзэ но өз кылдыты-а? ⁴¹(Тэркы, тусьты) пушкысь мар сётоноды вань, кураськисьёслы сётэлэ: соку тйляд ваньмыз чылкыт луоз. ⁴²Куректон тйледлы, фарисейёс: бутниклзэсь, рута турынлзэсь но пёртэм бакча сиёнъёслзэсь дасэти локетсэ сётиськоды, нош Инмарлэн судэз но яратонэз сярысь уд сюлмаськиське. Тае кароно вал, созэ но кельтоно ой вал. ⁴³Куректон тйледлы, фарисейёс, синагогаосын нырысетй радъёсын пуконэз, калык люкаськон интыосын зечкыламъёсыз яратэмды понна. ⁴⁴Куректон тйледлы, книга тодйсьёс, фарисейёс, чеберьяськисьёс, тй куштйськем шайгуос кадесь, кудъёсыз вылтй адямиос ветло но уг тодо соос сярысь».

⁴⁵Талы пумит закон тодйсьёс пöлысь кин ке но шуэм: «Дышетйсь! Тазы вераса, Тон милемыз вöсь кариськод». ⁴⁶Нош Иисус шуэм: «Тйледлы но, закон тодйсьёслы, куректон: адямиос вылэ жутыса вормонтэм ныпъетъёс ошиськоды, нош асьтэос пал чиньыеныды но со борды уд йöтйськиське. ⁴⁷Куректон тйледлы, атайёсыныды виылэм пророкъёслы шöй возён коркаос лэсьтылэмды понна. ⁴⁸Таин тй атайёстылзэсь ужъёссэс умоен лыдъямдэс возматйськоды, уго соос пророкъёсты виылйзы, нош тй соослы шöй возён коркаос лэсьтылйськоды. ⁴⁹Соин ик Инмарлэн визьлыкес

шуз: "Со доры пророкѣсты, апостольѣсты ысто, но соос пӧлысь огъѣссэ виѣзы, нош мукетъѣссэ – уллялозы. ⁵⁰Дунне кылдэм дырысен вань виылтэм пророкѣслэн вирзы понна та выжы кыл мед кутоз, ⁵¹Авельлэн вируз бордысен курбон сѣтон интыен храм вискин вием Захариялэн вируз дырозь. Зэм, тйледлы верасько, та выжы кыл кутоз. ⁵²Куректон тйледлы, закон тодйсьѣс, валатсконлэсь усьтонзэ тй басьтйды: асьтэос но ӧд пыре, пырисьѣслы но люкетйды». ⁵³Тае соослы вераса улыкуз, книга тодйсьѣс но фарисейѣс, трос юаньѣслы Иисуслэсь ответ курыса, Со борды зол тэбиньыны кутскиллям. ⁵⁴Сое чакласа улйллям, Сое янгыше уськытон вылысь, вераськон кылысьтыз шексэ утчаллям.

12-тй ЛЮКЕТ

¹Со куспын, куке сюрсьѣсын калык люкаськем но огзэс огзы жиптыса улйллям, нырысь ик дышетскисьѣсызлы вераны кутскем: «Чаклаське фарисейѣслэн шӧмзылэсь – чеберьяськонлэсь. ²Номырлэн но лушкем, шарае потытэк кылемез уг луы, лушкемлыкез но тодытэк уг кылӧ. ³Соин ик, мае тй пеймытын верады, югытын кылйськоз; мар верады пеле корка пушкын, со липет йыльѣсысен ялэмын луоз.

⁴Тйледлы верасько, Аслам эшъѣсылы: эн кышкалэ мугорез виисьѣслэсь, нош бӧрысь номыр но мукетсэ лэсьтыны быгатымтэослэсь. ⁵Но верало

тйледлы, кинлэсь кулэ кышканы: кышкалэ Солэсь, Кин вием бераз кысылйсьтэм тыл пöлы куштыны быгатэ. Зэм, тйледлы верасько, Солэсь кышкалэ. ⁶Вить пичиесь тылобурдоос уг-а вузасько кык ассариен? Одыгез но соос пöлысь Инмар дорын вунэтэмын öвöл. ⁷Нош тйляд йырысьтыды йырсиосты но ваньмыз лыдьямын. Озыен, эн кышкалэ: тй тросэзлэсь векчи тылобурдоослэсь дуногес.

⁸Тйледлы верасько: котькинэ но, кин Монэ тодэмзэ адямиос азын ватытэк вера, Адями Пи но Инмарлэн кылчингёсыз азын ватытэк вералоз; ⁹нош кин калык азын Мынэсьтым куштйське, со Инмарлэн кылчингёсыз азын куштйськемын луоз. ¹⁰Ваньмызлы, кин Адями Пилы пумит кыл вераз ке, сьöлыкез куштйськоз; нош кин Святой Дух вылэ урод кыл вераз ке, солы уз куштйськы. ¹¹Куке тйледыз синагогаосы, кузёйырйёс, властьёс азе ваёзы, эн сюлмаське, кызыы ответ-сётом яке мар вералом шуыса. ¹²Уго соку ик тйледыз Святой Дух дышетоз, мар вераны кулэ».

¹³Калык пöлысь кин ке но Солы шуэм: «Дышетйсь! Вера мынам братэлы, ваньбурез монэн шори мед люкоз шуыса». ¹⁴Нош Иисус шуэм: «Адями! Кин Монэ тйледыз судить карыны яке люкыны пуктйз?» ¹⁵Соку соослы шуэм: «Чаклаське, утиське мылкыддэс узырлык люканлы сётонлэсь, уго адямилэн улонэз ваньбурезлэн пачылэз бордысь уг поты». ¹⁶Соослы мадён верам: «Одыг узыр муртлэн бусыяз удалтэм ю-нянез вылэм. ¹⁷Ас понназ ачиз малпаськем: ¹⁸Мар мыным кароно? Но-

кытчы ни мыным емышьёсме тырыны”.¹⁸ Соку со шуэм: ”Тани мар каро: кеносьёсме сэртто но бадзымесьёссэгес пукто, отчы вань ю-няньме, ваньзэ ваньбурме локало.¹⁹ Но лулылы шуо: ”Лулы! Трос арьёслы тырмымон трос ваньбуред кылле: шутэтскы, си, ю, шулдырьяськы”.²⁰ Нош Инмар солы шуэм: ”Эй, нодтэм! Та уе тынэсьтыд лулдэ басьтозы; кинлы бен кылёз тынад та дасямед?”²¹ Озыы луэ соин, кин аслыз узырлык люка, нош Инмар азын узырлыкез өвөл».

²² Аслаз дышетскисьёсызлы верам: «Соин ик тйледлы шуисько: эн сюлмаське, лулды понна мар сиёно, мугорды понна мар дйсяно шуыса: ²³ Лул бадзымгес сиёнлэсь, нош мугор – дйськутлэсь. ²⁴ Кырныжьёс шоры учке ай: соос уг но кизё, уг но арало; өвөл соослэн ваньбур возёнзы но, кеносьёссы но, нош Инмар соосты сюдэ. Көнялы тй умоесьгес тылобурдоослэсь? ²⁵ Сюлмаськыса но, кин тй пöлысь быгатоз одйг гырпумлы ке но мугорзэ будэтыны? ²⁶ Озыен, таёе пичизэ но лэсьтыны уд быгатйське ке, мар мукетыз сярысь сюлмаськиськоды? ²⁷ Учке ай лилия сяськаос шоры, кызы соос будо: уг но ужало, уг но черсо. Но тйледлы верасько, Соломон, туж бадзым данэн улон дыръяз но, таос пöлысь одйгзы кадь но öз дйсяськы. ²⁸ Бусыысь турынэз но, кудйз туннэ вань, нош ёуказе гуре куштэмын луоз, Инмар озыы дйсяке, öжыт оскисьёс, көнялы соос тйлесьтыд умоесьгес? ²⁹ Мар тйледлы сиёно, мар тйледлы юоно шуыса эн утчалэ, эн но сюлмаське, ³⁰ малы ке шуоно, ваньзэ тае та дунне адямиос утчало. Нош

тйляд Атайды тодэ тйледлы со кулэ шуыса. ³¹Тужгес но Инмар Эксэйлыкез утчалэ, мукетъёсыз ваньмыз тйледлы сётэмын луоз. ³²Пичи уллё, эн кышка! Уго тйляд Атайды мылкыд кариз тйледлы Эксэйлык сётыны. ³³Юртъеръестэс вузалэ но курастькисьёслы сёткалэ. Асътэлы пösтьисътэм пуйыос, кулэсмисътэм ваньбур Инме дасялэ, кытчы лушкаськись но матаз уг мыны, кей но уг сиы. ³⁴Уго кытын тйляд ваньбурды, отын ик луоз сюлэмды но.

³⁵Кусъёсты езн керттэмын медло, югыт сётисъёсты – жуасесь. ³⁶Тй но сюанысь ас кузёзылэсь бертэмзэ возьмась адямиос кадесь луэлэ: бертыса йыгаськиз ке, со куспын ик солы мед усьтоды. ³⁷Шудоесь сыче ляльчиос, кудъёссэ кузёзы бертыкуз сак улыкузы учыртылйз ке. Зэм ик тйледлы верасько, со путозэ думоз но соосты жöк сьöры пуктылоз, доразы лыктоз но соосты утялтыны кутскоз. ³⁸Уйшоре яке чук зардон азын лыктыса, та сямен ик соосты шедьтйз ке, шудоесь со ляльчиос. ³⁹Тй тодйськоды ук, лушкаськисьлэсь кыче часын лыктэмзэ юрт кузё тодысал ке, сак улысал, юртсэ тйяса пырыны öй лэзьысал. ⁴⁰Тй но дась луэ, уго Адями Пи малпамтэ часады лыктоз».

⁴¹Соку Солы Петр шуэм: «Кузё-Инмаре! Ми-лемлы-а та мадёнэз вераськод яке ваньмызлы-а?»

⁴²Кузё-Инмар шуэм: «Кин оскиськымон но визьмо юрт утись, кудзэ юрт кузё медоосызлы нянь пайзэс ас дыраз мед сёткалоз шуыса пуктйз? ⁴³Шудо сыче ляльчи, кудзэ кузёез лыктыса тазы карыса улыкуз

учыртїз ке. ⁴⁴Зэмзэ тїледлы верасько: сое быдэс юртэзлы утисе пуктоз. ⁴⁵Нош со ляльчи аслаз сюлмаз шуиз ке: "Жоген уз берты ай мынам кузее", но кутскоз медоосты, медо нылкышноосты жугыны, сиыса-юыса, кудзїтозяз вина юыса улыны. ⁴⁶Соку та ляльчилэн кузеез солэн возьмамтэ нуналаз, малпамтэ часаз вуоз но чогыса куштоз, осконтэк улїсь муртгёсын сое одїг адзон люкетэ куштоз. ⁴⁷Ас кузеезлэсь эриксэ тодїсь но солэсь эриксэ быдэсьясътэм ляльчи, кудїз дась ой вал, зол жугемын луоз. ⁴⁸Нош кудїз өз тоды, но жугымон уж лэсьтїз, жугемын луоз өжытгес. Коткинлэсь но, кинлы трос сётэмын, трос ик куриськоз но; кинлы трос оскемын, солэсь тросгес юаськоз но.

⁴⁹Музьем вылэ тыл жуатыны Мон лыктї, кыче Мынам потэ, со тыл мед жуатскысал ни шуыса! ⁵⁰Пылатонэн Мон кулэ пылатїськыны. Та быдэсмытозь кыче Мон курадзїсько! ⁵¹Малпаськоды, Мон музьемлы тупаса улон сётыны лыктї? Ой. Тїледлы верасько: люкїськыса улон вайыны лыктї. ⁵²Табере одїг коркась вить муртгёс люкїськыны кутскозы: куинез кыкезлы пумит, нош кыкез куинезлы пумит. ⁵³Атаез пїезлы пумит луоз, нош пїез – атаезлы; анаез – нылызлы, нылыз – анаезлы; анайзы – кенэзлы, нош кензы анайзылы пумит луозы».

⁵⁴Калыклы но верам: «Шунды пуксёнысь жутскїсь пилемез адзїськоды ке, соку ик шуїськоды: "Зор луоз"; озыы ик луэ но. ⁵⁵Лымшорысь тёл пельтэ ке, шуїськоды: "Пёсь луоз". Озыы ик луэ

но. ⁵⁶Чеберьяськисьёс! Музьемлэсь но инлэсь ым-нырзэс тодманы быгатйськоды, нош та вадесэз кызы уд тодмаське?

⁵⁷Малы тй асьтэя но уд чаклаське мар луыны кулэез? ⁵⁸Сюрес кузя кузёйыр доры вожвыльяськон муртэныд мыныкуд, тыршы солэсь мозмытскыны: со тонэ судья доры медаз вайы, нош судья тонэ курадзйтйсь кие медаз сёты, нош курадзйтйсь тонэ пытсэтэ медаз кушты шуыса. ⁵⁹Тыныд верасько: берпум копейкадэ сётытэк, отысь уд поты».

13-тй ЛЮКЕТ

¹Та дыре киньёс ке но лыктйллям но Солаы вераллям, кызы Пилат Галилеяысь вием адямиослэсь вирзэс соослэн курбонлы сётэм пудо виренызы сураз. ²Иисус соослы та ласянь шуэм: «Тазы курадземзы понна таосыз Галилея муртьёс мукет Галилея адямиослэсь съолькoesьгес вал шуыса малпаськоды-а? ³Өвёл, – шуисько тйледлы, – нош өбкельыса съолькёстылэсь өд ке куштйське, ваньды тазы ик быроды. ⁴Оло, Силоам каланча дас тямыс мурт вылэ усьыса, соосты быдтйз, но соос Иерусалимысь вань улйсьёслэсь янгышoesьгес вал шуыса малпаськоды-а? ⁵Өвёл, – шуисько тйледлы, – нош өбкельыса съолькёстылэсь өд ке куштйське, ваньды тазы ик быроды».

⁶Иисус таҕе мадён верам: «Одйг муртлэн ви-
ноград бакчаяз смоквапуэз мерттымн вылэм; со
емышсэ утчаны лыктэм но шедьтымтэ. ⁷Соку со
виноград будэтисьлы шуэм: "Тани мон куинетй
арзэ та смоквапулэсь емышсэ утчаны ветлйсько
ни, нош номырзэ но уг шедьтйськы, кора сое:
мар со пайдатэк музьемез басьтыса улэ?" ⁸Нош
виноград будэтись солы ответ сётыса шуэм:
"Кузее! Та арлы но кельты ай сое, мон солэсь
котырзэ гудзо но кыед вёлдо: ⁹уз вайы-а со емыш.
Өз ке вайы, вуоно арын коралод сое"».

¹⁰Одйгаз синагогаын Иисус суббота нуналэ ды-
шетыса улэм. ¹¹Отын дас тямыс ар ҕоже курадзы-
тйсь духен улйсь кышномурт вылэм: со куасал-
тйськемын, йырзэ но жутэмез уг луы вылэм.
¹²Иисус сое адзыса дораз өтем но солы шуэм:
«Кышномурт! Тон ас курадзонэдлэсь мозмытс-
киськод». ¹³Со вылэ кизэ понэм. Со соку ик шо-
нертйськем но Инмарез данъяны кутскем. ¹⁴Соку,
синагогалэн кузеез, Иисуслэн суббота нуналэ бур-
мытэмезлы йыркуръяськыса, калыклы шуэм:
«Вань куать нунал, куке ужаны яра. Соку ик йө-
ватскыны лыктэ, суббота нуналэ уг яра». ¹⁵Солы
Кузё-Инмар ответ сётыса шуэм: «Чеберьяськись!
Котькудйз но тй пöлысь суббота нуналэ гидысь-
тыз ошсэ яке ишаксэ уг пертчылы но люктаны уг
нуы-а? ¹⁶Нош тае, Авраамлэсь нылзэ, кудзэ шайтан
дас тямыс ар талэзь азьвыл ини думылйз, уг яра
вал-а суббота нуналэ думетысьтыз мозмытыны?»
¹⁷Иисуслэсь та верам кыльёссэ кылыса, ваньзы

Солы пумитгьяськисьёс возьытэ вуиллям. Вань калык шумпотэм Солэн паймымон дано ужьёсыз понна.

¹⁸Иисус шуэм: «Инмар Эксэйлык малы укша, маин сое ёшотом? ¹⁹Со горчица кидыслы укша, кудзэ адями басьтэм но аслаз садаз мерттэм: будэм, бадзым писпу луэм, ин тылобурдоос вайёсаз пегзыса уйлллям». ²⁰Эшшо верам на: «Инмар Эксэйлыкез маин ёшотом? ²¹Со нянь шөмлы укша, кудзэ кышномурт басьтэм но, быдэсак чырса-тозязлы, куинь мертэт пызь пöлы понэм».

²²Городьёстй, гуртьёстй дышетыса, Иерусалиме сюрессэ азьланьтэм. ²³Кин ке но Солы шуэм: «Кузее! Ёжытэз гинэ адямиос утиськозы-а?» Иисус соослы шуэм: ²⁴«Тыршелэ ёоскыт капкатй пырыны, уго тйледлы верасько, тросэз пырыны тыршозы, но уз быгатэ. ²⁵Коркалэн Кузеез султыса өссэ пытсаз ке, соку тй, педлон сылыса, өсэ йыгаськоды но шуоды: "Кузё-Инмар! Кузё-Инмар! Усьты милемлы". Нош Со тйледлы ответ сётыса шуоз: "Тйледыз уг тодйськы, кытысь тй". ²⁶Соку тй вераны кутскоды: "Ми Тон азын сиимы, юимы, милям ульчаосамы Тон дышетйд". ²⁷Нош Со шуоз: "Тйледлы верасько: уг тодйськы тйледыз, кытысь тй. Кошке Мон дорысь, ваньды зэмлык-тэм уез лэсьтйсьёс". ²⁸Инмар Эксэйлыкысь Авраамез, Исаакез, Иаковез но вань пророкёсты адждоды, нош тй асьтэос педпала уллямын луоды, отын бөрдон, пинь сыскон луоз. ²⁹Шунды жу-жанысь но, шунды пуксёнысь но, уй палась но, лымшорысь но лыктыса Инмар Эксэйлыке ин-

тыяськозы. ³⁰Берпумьёс пöлын вань сыёеос, кудьёсыз нырысь радын луозы; нырысьёс пöлын вань сыёеос, кудьёсыз берпум радын луозы».

³¹Со нуналэ фарисейёс пöлысь куд-огез лыктйллям но Солы вераллям: «Пот но кошкы татысь, Ирод Тонэ виыны турттэ». ³²Иисус шуэм: «Мынэлэ но вералэ со зичылы: "Периосты уллясько, нош висисьёсты бурмытьясько туннэ но, ёуказе но. Куинетй нуналэ ужме быдэсто". ³³Озы ке но, Мон туннэ но, ёуказе но, мукетаз но нуналэ азылань мыныны кулэ, малы ке шуоно, Иерусалимлэн палэназ пророк виемын мед луысал – озы углубы». ³⁴Иерусалим, Иерусалим, пророкёсты сосьырясь, тон доры ыстэмьёсты изьёсын жугылись! Кызы тылобурдо аслэсьтыз пиоссэ бурд улаз люка, кöня пол Мон тынэсьтыд нылшиостэ люканы турттйсько вал, нош тй кулэ öд каре! ³⁵Тани тйляд коркады тйледлы тырттэм кельтйське. Тйледлы верасько: "Кузё-Инмарлэн нимыз понна Лыктйсь дано!" шуытозяды – тй Монэ уд ни адзе».

14-тй ЛЮКЕТ

¹Озы кемдэм: суббота нуналэ, фарисейёс пöлысь одйгезлэн кузёяськисьлэн гуртаз Иисус нянь сиёнэ лыктэм. Со сьöрын чакласа уйллям. ²Тани, Со азе ву пульюосын тöрнаса висись мурт султэм. ³Соку Иисус закон тодйсьёслэсь но фарисейёслэсь юам: «Суббота нуналэ яра-а эмьяны?» ⁴Соос чус уйллям. Бордаз йötйськыса со муртэз бурмытэм,

собере сое дораз бертыны лэзем. ⁵Соку соослы шуэм на: «Кинлэн ке но тй пöлысь ишакез яке ошез гудэме усиз ке, суббота нунал ке но учыраз, соку ик сое уз потты-а?» ⁶Солы та ласянь ноқыче но ответ сётыны быгатйллямтэ.

⁷Öтем муртёслэсь нырысетй интыосты быръемзэс адзем но соослы мадён верам: ⁸«Тонэ сюанэ öтизы ке, öтемёссы пöлын тынэсьтыд сйлыгесэз луыны быгатоз, соин ик, нырысетй интые эн пуксьы, – ⁹Тйледыз öтем мурт дорад лыктыса тыныд шуоно медаз лу: "Сёт солы инты". Соку возытэ вуыса, пумаз пуксёно луод. ¹⁰Öтёно луизы ке, лыкты но пумаз пуксьы: öтем муртэд дорад лыктыса мед шуоз: "Юлтоше! Төр сэреге пуксьы". Соку тыныд ёош пуксисьёсыд азын сй-дан луоз. ¹¹Уго котькудйз но ассэ ачиз вылие жутйсь мурт ултйямын луоз, нош ассэ ултйясь мурт – жутйськоз». ¹²Сое öтем фарисейлы Иисус шуэм: «Нуназе нянь яке жыт нянь карыкуд эшгёстэ но, агай-вынгёстэ но, ёыжы-выжыостэ но, узыресь бускельёстэ но эн öты, соос но тонэ öтыса, пунэмзэ медаз берыктэ шуыса. ¹³Куное öтчаськыкуд, кураськисьёсты, сёсырмемьёсты, чутгёсты, синтэмьёсты öть. ¹⁴Шудо луод: тынад зечедлы соос пунэмзэ зечен берыктыны уз быгатэ, нош шонер улэмьёс улзыса султыку, тынад зечед зечен берыктйськоз».

¹⁵Тае кылыса, Соин огазын сиськисьёс пöлысь кин ке но Солы шуэм: «Шудо, кин Инмар Эксэйлыкын нянь сиёз!» ¹⁶Нош Иисус солы шуэм: «Одйг адями бадзым жыт нянь сиён ортчытэм но трос муртэ öтем. ¹⁷Жыт нянь сиён вуэм но ляльчизэ

өтемъёслы вераны ыстэм: "Лыктэ, ваньмыз дась ини".¹⁸ Но ваньзы, огкылысь вераськем кадь, чөл-ляськыны кутскиллям. Нырысетйез солы шуэм: "Мон музъем басьтй но сое учкыны мыноно. Курисько тонэ, вождэ эн вайы".¹⁹ Мукетыз шуэм: "Мон вить пар ошъёс басьтй но мынйсько соослэсь ужамзэс эскерыны. Курисько тонэ, вождэ эн вайы".²⁰ Куинетйез шуэм: "Мон кышнояськи, соин ик лыктыны уг быгатйськы".²¹ Гуртаз бертыса, со ляльчи та сярысь аслаз кузёезлы верам. Соку коркалэн кузёез, йырыз кур луыса, аслаз ляльчизлы шуэм: "Жоггес мын карлэн ульчаосыз, пролкаосыз кузя, вай татчы кураськисьёсты, сёсырмемъёсты, чутъёсты, синтэмъёсты".²² Ляльчи шуэм: "Кузёе! Быдэстэмын тынад косонэд, эшшо но интыос вань на".²³ Кузё ляльчилы шуэм: "Сюресъёс кузя, кенерьёс кузя мын, ваньзэс лыктыны кос, мынам коркае калыкен тыраз мед луоз."²⁴ Тйледлы верасько: со өтемъёс пöлысь нокин но мынэсьтым сиёнме уз верья: уго отиськемъёс трос, нош быръемъёсыз öжыт"».

²⁵Соин валче трос калык мынэм. Берытскыса Иисус соослы шуэм: ²⁶«Кин Мон доры лыктэ но адзонтэм уг ке кары аслэсьтыз атайзэ, анайзэ, кышнозэ, нылпиоссэ, агай-вынъёссэ, сузэръёссэ, аслэсьтыз улонзэ но, со Мыным дышетскись луыны уг быгаты.²⁷ Кин аслэсьтыз кироссэ уг нуы, Мон сьöры уг мыны, со Мыным дышетскись луыны уг быгаты.²⁸ Уго, кин тй пöлысь каланча пуктыны малпаз ке, нырысь ик уз пуксьы но уз лыдья, кöня луоз кутон-тыриськонэз, сое йылпумъяны

вань-а солэн моѳез. ²⁹Инъетсэ понэм бераз, өз ке быгаты корказэ пуктыса быдэстыны, ваньмыз ад-зисьёс медаз серекъялэ вал сое, ³⁰тазыы вераса: "Та адями лэсьтйськыны кутскиз но быдэстыны өз быгаты-а?" ³¹Яке кыѳе эксэй, мукет эксэйлы пумит ожмаськонэ мыныкуз, нырысь ик уз пуксыы но уз кенешы, вань-а солэн кужымез дас сюрс муртэн, нош со вылэ кызь сюрс муртэн лыктйсь-лэн пумитаз султыны? ³²Нош өвёл ке, соиз кы-дёкын на дыръя, со доры вераськисьёсты тупаса улон курыны со ыстоз. ³³Озыы ик тй пöлысь, кин ке өз куштйськы ваньмызлэсь, маиз солэн вань, Мыным дышетскись луыны уг быгаты.

³⁴Сылал – со зеч арбери; нош сылал кузбытсэ ыштйз ке, маин сое тупатод на? ³⁵Музьеме но, кыед пöлы но поныны уг яра; педло сэрпалто сое. Кылыны пельыз вань мурт, мед кылоз!»

15-тй ЛЮКЕТ

¹Солэн матаз вань выт бичасьёс, съöлыкоос Сое кылзйськыны лыктйллям. ²Фарисейёс но книга тодйсьёс зургетыса улйллям, шуиллям: «Со съö-лыкоосын кусып возе, соосын огазын сиське» ³Соку Иисус соослы таѳе мадён верам: ⁴«Кин тй пöлысь сю ыжез вань вылысь одйгзэ ыштйз ке, укмыстон укмыссэ кыре кельтыса, ыштэм ыжзэ шедьтытояз уз утча?» ⁵Шедьтэм бераз шумпотыса, сое пельпумаз жутоз. ⁶Дораз бертыса, эшьёссэ, бускельёссэ öтёз но соослы шуоз: "Монэн валче

шумпотэ, мон ышем ыжме шедьтй”. ⁷Тйледлы верасько: озьы ик Инмын но, одйг съолько мурт понна, кудйз обкельыса съолькьёсызлэсь куштйське, укмыстон укмыс шонер улийсьёс сярысь, кудьёсызлэн обкельыса съолькьёслэсь куштйськыны кулэ овёл, бадзымгес шумпотон луоз.

⁸Яке кыче кышномурт, дас драхма коньдонэз вань вылысь одйгзэ ыштйз ке, сюсьтыл жуатыса комнатазэ уз чужы но шедьтытозяз сое пыр-поч уз утча? ⁹Нош шедьтэм бераз эшьёссэ, бускельёссэ өтёз но шуоз: ”Монэн валче шумпотэ, мон ыштэм драхмаме шедьтй”. ¹⁰Озьы, тйледлы верасько, Инмар кылчиньёслэн шумпотонзы одйг съолько обкельыса съолькьёсызлэсь куштйськись мурт понна но луэ».

¹¹Эшшо верам на: «Кыче ке но адямилэн кык пиез вылэм. ¹²Соос пöлысь покчиез атаезлы шуэм: ”Атай! Вай мыным юртъерлэсь суроно люкетсэ”. Атаез юртъерзэ соослы люкем. ¹³Трос ик нунальёс ортчымтэ, покчиез пи ваньзэ бичам но кыдёкысь шаере кошкем, калгыса, азыса улэм но отын вань юртъер люкетсэ тус-тас карем. ¹⁴Ваньзэ быдтэм бераз, со кунын туж секыт сютэм ар луэм, но со зудыса улыны кутскем. ¹⁵Мынэм но та кунын улийсь одйг мурт доры интыяськем, нош соиз бусыяз парсьёсты возьманы сое ыстэм. ¹⁶Со шумпотыса кöтсэ тырысал парсьёслы сюдоно пуртэсо сиёнэн, нош солы нокин но сое уг сёты вылэм. ¹⁷Визь пырем бере, со шуэм: ”Атае дорын кöня медьяськем муртъёс нянен тыр уло, нош мон сютэм кулийсько ини! ¹⁸Султо, мыно атае доры но

солы шуо: Атай! Инлы но, тон азын но мон съ-
лыкай, ¹⁹тынад пиед шуыса лыдзиськыны но мон
уг яраськы ни. Басьты монэ медоосыд радэ”.
²⁰Султэм но атаез доры кошкем. Кыдэкысен ик
сое атаез адзем но жаль потэм, бызьыса мынэм
но чырты бордаз зыгыртйськыса чупам сое. ²¹Нош
пиез солы шуэм: ”Атай! Инлы но, тон азын но
мон сълыкай, тынад пиед шуыса лыдзиськыны
но мон уг яраськы ни”. ²²Атаез ляльчиосызлы ве-
рам: ”Ваелэ умойзэ дйськут, – дйсялэ сое, кияз
зундэс сётэ, пыдаз – пыдкучан. ²³Ваелэ куайы-
тэмзэ кунянэз но вандэлэ: сиёме, шулдырьясь-
коме, ²⁴уго мынам таиз пие кулэмын вал, но улзиз,
ышыса улйз, но сюриз”. Шулдырьяськыны кутс-
киллям. ²⁵Бадзымез пиез бусыын вылэм. Бертыкуз,
дорезлы матэ вуыса, кырзам, шулдырьяськем
куараосыз кылэм. ²⁶Медоос пöлысь одйгзэ öтьыса
юам: ”Мар та таёе?” ²⁷Соиз солы шуэм: ”Выныд
бертйз но атаед куаййтэм кунянэз вандйз, малы
ке шуоно, со таза куен берытскиз”. ²⁸Со вожзэ
поттэм, корка пырыны ик уг ни малпа вылэм.
Нош атаез потыса сое öтем. ²⁹Но со атаезлы ответ
сётыса шуэм: ”Тани, көня ар мон тыныд ужасько
ни, одйг косондэ но быдэстытэк öй кельты, нош
тон мыным эшъёсыным шулдырьяськыны кеч-
пидэ но öд сёты. ³⁰Нош тани, та пиед, юртьер
локетсэ азэм нылъёсын калгыса быдтыса бертйз
но, тон со понна куаййтэм куняндэ вандйд”.
³¹Атаез солы шуэм: ”Пие! Тон котьку но монэн
огазын, май мынам вань, – со ваньмыз тынад.
³²Со понна кулэ вал шумпотыны, шулдырьясь-

кыны: та выныд кулэмын вал, но улзиз, ышыса улзиз, но сюриз”».

16-тй ЛЮКЕТ

¹Аслаз дышетскисьёсызлы Иисус верам: «Одйг адями узыр улэм. Вылэм солэн юртэныз кивалтйсьез, кудйз вылэ солэсь юртсэ тус-тас каре шуыса урттылйськиллям. ²Сое өтем но солы шуэм: ”Мар со сыче мон тон сярысь кылйсько? Кивалтон уждья отчёттэ возьматы, азыланяз тон кивалтыны уд яраськы ни”. ³Соку юртэн кивалтйсь аслыз ачиз шуэм: ”Мар мыным кароно? Кузё юртэн кивалтон ужме басьтэ ини. Гудзйськеме уг луы, кураськыны воздаськисько. ⁴Юртэн кивалтон ужлэсь палэнтэмын луи ке, коркаосазы мед пыртозы шуыса, тодйсько ма карыны”. ⁵Кузёезлэсь пунэм тыроно муртъёссэ котькудзэ нимаз-нимаз өтем но нырысетйезлы шуэм: ”Кузёелы көня тынад тыронэд?” ⁶Со шуэм: ”Сю мертэт вöй”. Соку солы шуэм: ”Басьты ки нюртэм гожтэттэ но жоггес пуксьыса гожты: витьтон”. ⁷Собере мукетызлы шуэм: ”Нош тынад көня тыронэд?” Со ответ сётэм: ”Сю мертэт чабей”. Таизлы со шуэм: ”Басьты ки нюртэм гожтэттэ но гожты: тямыстон”. ⁸Валатскыса ужомез понна, кузё кескич кивалтйсьсэ ушъям; уго таизлэн дуннелэн пиосыз асьсэ куспын валатскисесьгес югытлэн пиосызлэсь. ⁹Мон тйледлы верасько: оскиськыны луонтэм узырлыкэн асьтэлы эшъёс кутэлэ: начармоно луиды ке, соос

тйледыз бырисьтэм юртъёсы мед басьтозы.
¹⁰Ӧжытын оскиськымон, бадӟымын но оскись-
 кымон луэ, нош ӧжытын оскиськонтэм, бадӟымын
 но оскиськонтэм луэ. ¹¹Озьыен, оскиськыны луон-
 тэм узырлыкын тй оскиськымон ӧй вал ке, кин
 тйледлы зэмоссэ узырлыкез оскоз? ¹²Муртлэнын
 но тй оскиськымонэсь ӧй вал ке, кин тйледлы
 тйлесьтыдзэ сётоз? ¹³Но кыче но медо кык кузёлы
 служить карыны уг быгаты: уго яке одйгзэ адзем-
 потостэм кароз, нош мукетсэ – яратоз; яке огезлы
 сюлмысьтыз тыршоз, нош мукетыз сярысь уз сюл-
 маськы. Уд быгатйське Инмарлы но, маммоналы
 но огдыре служить карыны».

¹⁴Ваньзэ тае фарисейёс но кылйллям, соос конь-
 донэз яратйсье вылйллям, Сое серем кариллям.
¹⁵Иисус соослы шуэм: «Адямиос азын тй асьтэ-
 дыз шонер улйсьёсын возматйськоды, нош Ин-
 мар тодэ тйлесьтыд сюлэмъестэс: уго мар адямиос
 понна вылй, со Инмар азын юрӟым. ¹⁶Закон но
 пророкъёс Иоанн дырозь вал; та дырысен Инмар
 Эксэйлык тодытйське, котькин но кужмысь тыр-
 шыса отчы пыре. ¹⁷Законысь одйг гожез но уз бы-
 ры, жоггес ин но музьем бырозы. ¹⁸Котькин но,
 аслаз кышноеныз люкиськыса, мукетсэ кышно
 басьтэ ке, азон-калгон съӧлык лэсьтэ; котькин но
 картэныз люкиськем муртэ кышно басьтэ ке, азон-
 калгон съӧлык лэсьтэ.

¹⁹Одйг адями узыр улэм, дуно басмаослэсь, да-
 ралилэсь вурем дйськут нуллэм, котькуд нунал
 шукырес сиён-юон дыр ортчытъям. ²⁰Вылэм кыче
 ке но Лазарь нимо кураськись, кудйз гижлоӟыса

солэн капка выжыяз кыллем. ²¹Узырлэн жök вы-
лысьтыз усъылэм нянь пырыосын көтсэ тырыса
улэм. Пуныос лыктыса солэсь гижлозэ нюлыса
уйллям. ²²Кураськись кулэм но кылчинъёс сое
Авраамлэн ал вылаз нуиллям. Узыр но кулэм,
сое ватйллям. ²³Адысен, курадзыса улыкуз, узыр
мурт синзэ жутэм но кыдёкысен Авраамез но со
дорысь Лазарез адзем. ²⁴Соку со черектйськыса
верам: "Авраам атай! Жаля монэ, ысты Лазарез,
чиньы йылзэ вуэ коттыса, кыл йылме мед сйяты-
сал, уго туж курадзисько та тыл пöлын!" ²⁵Нош
Авраам шуэм: "Пие! Тодад вай али: ас улон
даурад тон зечсэ басьтйд, нош Лазар – уродзэ.
Табере со татын майбыр улэ, нош тон курадзись-
код. ²⁶Солэсь но ортчыт, ми куспын но тй куспын
син сузёнтэм пыдэстэм гу кылдытэмын, ми до-
рысь тй доры потыны турттйсьёслэн потэмзы уг
луы, озьы ик со палась но ми доры уг выжо".
²⁷Соку узыр мурт шуэм: "Тонэ курисько, атай,
ысты Лазарез мынам атаелэн юртаз, ²⁸уго мынам
вить кузя агай-выньёсы: та курадзон интые соос
но медаз лыктэ шуыса, Лазарь мед тодытоз соос-
лы". ²⁹Авраам шуэм: "Соослэн Моисейзы но про-
рокъёссы вань; соосты мед кылзйськозы". ³⁰Узыр
мурт шуэм: "Öвöл, Авраам атай! Соос доры кин
ке но кулэмъёс пöлысь лыктйз ке, соос öбкельыса
сьöлыкъёссылэсь куштйськозы". ³¹Соку Авраам
солы шуэм: "Моисеез но пророкъёсты уг кылзо
бере, кулэмъёс пöлысь кин ке улзыса султйз ке
но, уз оске"»

17-тй ЛЮКЕТ

¹Аслаз дышетскисьёсызлы Иисус верам на: «Сьö-лыкe пыртйсь ужъёс лыктытэк уз кыле, но куректон-кайгу со адямилы, кин пыр соос лыкто: ²та пичиос пöлысь одйгзэ сьöлыкe пыртытозь, со адямилы умойгес луысал, чыртыяз вуко кö ошыса, зарезе куштысалзы ке. ³Асьтэдыз асьтэос чаклалэ. Братэд тыныд пумит сьöлыказ ке, тон солы ваньзэ вера, öбкельыса сьöлыкъёсызлэсь куштйськиз ке, солы простить кар. ⁴Нунал куспын тыныд пумит сизьым пол сьöлыказ ке, но сизьым пол тыныд вазиськыса шуиз ке: "Öбкельыса сьöлыкъёсылэсь куштйськисько", – простить кар солы».

⁵Апостольёс Кузё-Инмарлы шуиллям: «Милесытым осконмес будэты». ⁶Кузё-Инмар шуэм: «Вень йыл быдза гинэ осконды луыса та смоквапулы: "Вырзы интыысьтыд но пуксы зарезе" шуысалды ке, со тйлесытыд кылзйськысал.

⁷Ляльчиез гырыса яке пудо возьмаса бусыысь бертйз ке, кин тй пöлысь солы шуоз: "Жог лыкты, пуксы жök сьöры"? ⁸Озы шуэм интые, уз шуы-а солы: "Жыт нянь мыным дая, путодэ дум но, мон сиськытозь, юытозь, мыным ужа, бöрысь ачид си, ю"? ⁹Солэсь косонзэ быдэстэм понназ, та ляльчилы со тау кароз-а? Уз, дыр. ¹⁰Озы ик тй но, вань косэмез быдэстйды ке, шуз: "Ми номырлы ярасьтэм ляльчиос, малы ке шуоно, лэсьтймы сое гинэ, мае кулэ вал лэсьтыны"».

¹¹Иерусалиме мыныкуз, Иисус Самариен Галилея вискытй ортчем. ¹²Одйгаз гуртэ пырыкуз, Сое

гижло черен висись дас адямиос пумиталлям, соос палэнэ дугдйллям но ¹³бадзым куараен вераллям: «Иисус Дышетйсь! Жаля милемыз!» ¹⁴Соосты адзыса, Со шуэм: «Мынэлэ, священникъёслы возьматске». Мыныкузы ик дунмаллям. ¹⁵Соос пöлысь одйгез, аслэсьтыз бурмемзэ шödэм но, Инмарез бадзым куараен данъяса берытскем. ¹⁶Иисуслы тау карем, пьдесьяськыса йыбырттэм. Со Самария пи вылэм. ¹⁷Соку Иисус шуэм: «Дасназы ик öз чылкыталэ-а? Нош укмысэз кытын? ¹⁸Мурт выжыысь та адями сяна, малы соос Инмарез данъяны öз берытске?» ¹⁹Та пилы Иисус шуэм: «Султы, мын; тынад осконэд тонэ утиз».

²⁰Фарисейёслэн «ку Инмар Эксэйлык лыктоз» шуыса юамзылы, Иисус таёе ответ сётэм: «Инмар Эксэйлык шödйськымон амалын уз лыкты. ²¹Уз но шуэ: "Тани, со татын", яке: "Тйни, отын". Уго тани, Инмар Эксэйлык тйляд пушкады вань». ²²Дышетскисьёсызлы верам на: «Вуозы нунальёс, кукке Адями Пилэсь одйгэз ке но нуналзэ адземды потоз, но уд адже. ²³Тйледлы шуозы: "Тани, татын", яке: "Тйни, отын", – эн ветлэ, эн но улляське. ²⁴Кызы чилектэм инбамлэн одйг пал пумысеныз инбамлэн мукет палозяз воректэ, озьы Адями Пи луоз Аслаз лыктон нуналаз. ²⁵Но азьлон Солы трос курадзонэз но та выжылэсь куштйськемзэ чидано луоз. ²⁶Ной улон нунальёсы кызы вылэм, озьы ик луоз Адями Пилэн нунальёсыз дыръя но: ²⁷Ной пыже пырытозь, сииллям, юиллям, кышнояськиллям, бизиллям, ву нюртон вуэм но ваньзэс быдтэм. ²⁸Озьы ик вылэм Лот улон дырйёсы:

силлям, юиллям, басьясъкиллям, вузаллям, мертїськиллям, лэсьтїськиллям; ²⁹Но Лот Содомысь потэм нуналэ инбамысь тылын, чуждариен жуась зор кисьтїськем но ваньзэс быдтэм. ³⁰Озы ик луоз Адами Пи лыктон дыръя но. ³¹Со нуналэ кин липет йылаз учыраз ке, нош тїрлыкез – коркан, эн васькы соосты басьтыны; нош кин бусые учыраз ке, озы ик берлань эн берытскы: ³²Лотлэсь кышнозэ тодады вае. ³³Кин аслэсьтыз лулзэ утыны кутскоз, со сое быдтоз; нош кин сое быдтоз, со сое улзытоз. ³⁴Тїледлы верасько: со уе одїг валес вылын кык мурт луозы: одїгез басьтїськоз, нош мукетыз кельтэмын луоз. ³⁵Кык кышномуртїес чош изозы: одїгез басьтэмын луоз, нош мукетыз – кельтэмын. ³⁶Кыкназы луозы бусын: одїгез басьтэмын луоз, нош мукетыз – кельтэмын». ³⁷Та ласянь Сола шуиллям: «Кытын, Кузё-Инмаре?» Иисус соослы шуэм: «Кытын шой, отчы ик өрзиос но люкаськозы».

18-тї ЛЮКЕТ

¹Усем мылкыдын улытэк, ялан вöсяськыса улонлэн кулэез сярысь Иисус соослы мадён верам, ²шуэм: «Одїг городын вылэм судья, кудїз Инмарлэсь уг курда, адямиослэсь уг возьдаськы вылэм. ³Со городын ик вылэм одїг палкышно, со судья доры лыктыса шуылэм: "Тушмонъяськись муртэ азын мыным дурбасьты". ⁴Нош солэн кема дыр чоже мылыз потымтэ. Но бöрысь ас

понназ ачиз шуэм: ”Инмарлэсь уг ке но курдаськы, калыклэсь уг ке но возьдаськиськы, ⁵та палкышно мыным каньылэн улыны маза уг ни сёты бере, солэн палаз пыро: огпöртэм мыным акыльтыса медаз ни ветлы”». ⁶Кузё-Инмар шуэм: «Кыльсь-коды-а, мар шуэ шонер улйсьтэм судья? ⁷Инмар-а уз уты Аслэсьтыз быръемьёссэ, уй но нунал Со-лы тэльмырисьёсты, соослы дурбасьтыны уз-а дырты? ⁸Тйледлы верасько: жоген соослы дур-басьтоз. Нош Адями Пи лыктйз ке, шедьтоз на меда музьем вылысь осконэз?»

⁹Асьсэды шонер улйсьёс шуыса лыдьясьёслы, нош мукетъёссэ ултйяса улйсь куд-ог муртъёслы Иисус таё мадён верам: ¹⁰«Кык адямиос храме вöсяськыны пыриллям: одйгез фарисей, нош мукетыз – выт бичась. ¹¹Фарисей султыса, ас понназ ачиз тазы вöсяськем: ”Инмаре! Тыныд тау карисько мон сыёе öвöлысь, кыёеесь луо мукет муртъёс – адями таласьёс, ултйясьёс, азыса-калгыса улйсьёс, яке тани, та выт бичась кадь. ¹²Арнялы быдэ кык пол визясько, мар гинэ басьтйсько, да-сэтй локетсэ сётйсько”. ¹³Нош выт бичась, палэнын сылыса, синзэ но инме жутыны дйсьтымтэ. Со гадяз шуккылыса шуэм: ”Инмаре! Жаля монэ, сьöлыкоез!” ¹⁴Тйледлы верасько: соиз сярысь таиз юнгес шонере потыса дораз бертйз: уго котькудйз но ассэ ачиз вылье жутйсь мурт ултйямын луоз, нош ассэ ачиз ултйясь мурт – жутйськоз».

¹⁵Бордазы мед йöтйськоз шуыса, Иисус доры нылпиосты но вайылйлям. Нош дышеткисьёс-сыз, тае адзыса, соосты пырыны лэзьытэк улйл-

лям. ¹⁶Иисус соосты дораз отьыса шуэм: «Лэзе нылшиосты, эн люкетэ соослы Мон доры ветлыны, уго таћеослэн Инмар Эксэйлыксы вань. ¹⁷Зэм ик тйледлы верасько: кин Инмар Эксэйлыкез нылпи кадь кабыл өз ке басьты, со отчы уз пыры».

¹⁸Кин ке но кузёяськисьёс пöлысь Иисуслэсь юам: «Зеч Дышетйсь! Быронтэм улон басьтон понна, мон мар лэсьтыны кулэ?» ¹⁹Иисус солы шуэм: «Малы тон монэ "Зеч" шуиськод? Одйг Инмар сяна, нокин но зеч өвөл. ²⁰Курон-косонъёсты то-дйськод: азон-калгон сьöлыке эн пыры; эн виы; эн лушкаськы; öрекчаськыса өвöлтэмзэ эн вера; атайдэ но, анайдэ но сйлы кар». ²¹Нош со шуэм: «Ваньзэ тае мон егит дырысеным ик ути». ²²Тае кылыса, Иисус солы шуэм: «Одйгез гинэ уг тырмы на тыныд: маид вань, ваньзэ вуза но кураськисьёслы сётка, узырлыкед Инмын луоз. Лыкты, Мон сьöры мын». ²³Нош со тае кылыса жожомем, малы ке шуоно, туж узыр былэм.

²⁴Иисус талэсь жожомемзэ адзыса шуэм: «Ма-кем секыт узырлыксы ванё муртъёслы Инмар Эксэйлыке пырыны! ²⁵Уго узыр муртлы Инмар Эксэйлыке пырон сярысь, верблюдлы капчигес вень пась пыр потынь». ²⁶Тае кылйсьёс шуиллям: «Кин бен утиськыны быгатоз?» ²⁷Иисус шуэм: «Адямиос мае лэсьтыны уг быгато, Инмарлэн ваньзэ лэсьтэмез луэ». ²⁸Петр шуэм: «Тани ми ваньзэ кельтймы но Тон сьöры мыймы». ²⁹Иисус соослы шуэм: «Зэм ик тйледлы верасько: өвөл одйгез но, кин Инмар Эксэйлык понна мед кель-тысал корказэ, яке анай-атайзэ, яке агай-выньёссэ,

яке сузэр-апайёссэ, яке кышнозэ, яке нылпиоссэ,
³⁰но медаз басьты вал таяз улонын ик троссэ, нош
вуоно даурын – быронтэм улон».

³¹Иисус Аслэсьтыз дас кыксэ ик дышетскисьёссэ
өтем но соослы шуэм: «Тани асьмеос Иерусалим
пала тубиськомы, пророкёс пыр Аядми Пи
сярысь ваньмыз гожтиськем быдэсмоз: ³²Сое языч-
никёс кие сётозы, сйтэм-сантам карозы, ултйяло-
зы, Со вылэ сялалозы, ³³жугозы, виёзы Сое; нош
куиньметй нуналаз улзыса султоз». ³⁴Но соос та
верамысь номырзэ но валаллянтэ; та кыльёс
соослэсь ватиськемын выйллям, верамез соос
валаллянтэ.

³⁵Иерихон доры вуыкуз, сюрес дурын кураськыса
пуке вылэм одйг синтэм мурт. ³⁶Со вөзтй калык
ортче шуыса кылэм но аядмиослэсь юам: «Мар
та таёе?» ³⁷Солы Назаретысь Иисус лыктэ шуил-
лям. ³⁸Соку со черектиськем: «Давидлэн Пиез
Иисус! Жаля монэ». ³⁹Азьпалтй мынйсьёс сое шы-
пыт улыны косйллям; нош со эшшо но бадзы-
менгес кесяськем: «Давид Пи! Жаля монэ». ⁴⁰Иисус дугдэм но сое Ас дораз вайыны косэм.
Со доры лыктэм бере, солэсь юам: ⁴¹«Мар тыныд
Мынэсьтым кулэ?» Со шуэм: «Кузёе! Адзыны мед
кутскысал». ⁴²Иисус солы шуэм: «Адзись лу!
Тынад осконэд тонэ утиз». ⁴³Со соку ик адзыны
кутскем но, Инмарез даньяса, Иисус бёрсы
мынэм. Вань калык, тае адзыса, Инмарез ушьян
кыльёс верам.

19-тй ЛЮКЕТ

¹Собере Иисус Иерихонэ пырем, со пыр ортчем. ²Соку выт бичасьёслэн йырзы, Закхей нимо узыр адями, ³Иисусэз, кин Со шуыса, адзыны турттыса утчам, но калык съорысен адзыны быгатымтэ, малы ке шуоно, со лапег мугоро вылэм. ⁴Азьпала бызьыса потэм но, Иисусэз адзон понна, смоквапуэ тубем, – уго Со та вöзтй ортчыны кулэ вылэм. ⁵Иисус та интые вуэм бераз, вылэ учкем но, Закхеез адзыса, солы шуэм: «Закхей! Жоггес васькы, туннэ Мон тынад коркад луыны кулэ». ⁶Со жогак васькем но шумпотыса Иисусэз дораз пыртэм. ⁷Тае адзыса, ваньзы зургетыны кутскиллям, Со съöлыко мурт доры пыриз шуыса вераллям. ⁸Нош Закхей султэм но Кузё-Инмарлы шуэм: «Кузёе! Жыны ваньбурме кураськисьёслы сёто, кинэ ке, маин ке жоже уськытйськем ке, пунэмме ньыль полэс берыкто». ⁹Иисус солы шуэм: «Туннэ нуналэ та коркалы утиськон лыктйз, малы ке шуоно, со но Авраамлэн пиез. ¹⁰Уго Адями Пи быремзэ утчаны, сое утыны лыктйз».

¹¹Соос тае кылзйськыку, мадён ватсам на. Иерусалимлы матэ вуэм бере, соос малпаллям жоген Инмар Эксэйлык вуыны кулэ шуыса. ¹²Иисус верам: «Вый, дано выжыысь кыче ке но узыр адями, кыдёкысь шаере мыныны но аслыз эксэйлык басьтыса берытскон вылысь сюрес вылэ дасяськем. ¹³Дас ляльчиоссэ öтем но соослы дас мина* коньдон сётыса шуэм: "Мон бертытозь,

* 19:13 Рим кунысь зарни яке азвесь коньдон.

соосты уже кутэ”. ¹⁴Нош татын ульсьёс сое кӧт-
веськантэм каро вылэм. Со бӧрсьы вераськон
нуисьёсты ыстйллям но шуиллям: ”Милям сое
асьмелы эксэй кареммы уг поты”. ¹⁵Эксэйлык
басьтыса берытскем бераз, кинлэсь мар басьтэмзэ
тодыны шуыса, ляльчиосты ӧтьытэм, кудьёсызлы
со азвесьсэ сёткам. ¹⁶Нырысетйез лыктэм но шуэм:
”Кузё! Тынад минаед дас мина ваиз”. ¹⁷Солы шуэм:
”Умой, лякыт ляльчи! Ӧжытын но оскымон луэ-
мед понна, басьты дас городэз ки улад”. ¹⁸Кыке-
тйез лыктэм но шуэм: ”Кузё! Тынад минаед вить
мина ваиз”. ¹⁹Таизлы но шуэм: ”Тон но вить го-
родлы кивалтйсь лу”. ²⁰Куинетйез лыктэм но шу-
эм: ”Кузё! Тани тынад минаед, кудзэ мон кышетэ
бинялтыса вози. ²¹Мон тынэсьтыд кышкай, уго
тон лек адями: мае ӧд тыры, басьтйськод, мае ӧд
кизыы, араськод”. ²²Кузёез солы верам: ”Тынад
ымыныд, кескич ляльчи, тонэ судить каро! Тон
тодйськод вал, мон лек адями, тырымтэме
басьтйсько, кизьымтэме арасько шуыса. ²³Бертыса
мон сое вылй пайдаен мед басьтысал шуыса, малы
тон мынэсьтым азвесьме уже ӧд куты?” ²⁴Сы-
лйсьёслы верам: ”Басьтэ солэсь мина коньдонзэ
но, кинлэн дас минаез вань, солы сётэ”. ²⁵Солы
шуиллям: ”Кузё! Солэн дас минаез вань”. ²⁶”Тй-
ледлы верасько: котькудйзлы ванё муртлы сётйсь-
коз, нош ӧвӧло муртлэсь маиз вань, соиз но бась-
тэмын луоз. ²⁷Тушмонъёсме, кудьёсызлэн монэ
эксэй каремзы уг поты, ваелэ татчы но тышкалэ
мон азын”».

²⁸Тае верам бераз, Иисус азьлане кошкем, Иерусалим пала тубем. ²⁹Виффагиен Вифания гуртѣс доры, Елеон шуон гурезьлы матэ вуэм бераз, Аслэсьтыз кыксэ дышетскисьёссэ ыстэм³⁰ но шуэм: «Мынэлэ вадьсысьтыды гуртэ. Отчы пырем берады, гозыям пинал ишакез шедьтоды, кудйз вылэ адямиос пöлысь нокин но, ноку но пуксьылымтэ; пертчыса сое татчы вае. ³¹Нош кин ке юаз ке тйледыз: "Малы пертчиськоды?" Со лы тазы шуэлэ: "Со Кузё-Инмарлы кулэ"». ³²Ыстэм муртѣс мынйллям но шедьтйллям озыы, кызыы Со верам соослы. ³³Пинал ишакпиез пертчылыкузы, кузёосыз соослы шуиллям: «Малы ишакпиез пертчылйськоды?» ³⁴Соос ответ сётйллям: «Со Кузё-Инмарлы кулэ». ³⁵Сое Иисус доры ваиллям; ишакпи вылэ дйськутсэс валиллям но со вылэ Иисусэз пуктйллям. ³⁶Со мыныку, адямиос сюрес вылэ дйськутсэс вöлдйллям.

³⁷Елеон гурезьысь васьконлы матэ вуэм бераз, вань дышетскисьёсыз шумпотыса, вань паймымон ужьёсты адземзы понна, бадзым куараен Инмарез даньяны кутскиллям. ³⁸Вераллям:

«Дано мед луоз

Кузё-Инмарлэн нимыз понна лыктйсь Эксэй!

Каньыллык Инмын, данлык вылйын!»*

³⁹Калык пöлысь куд-ог фарисейёс Иисуслы шуиллям: «Дышетйсь! Эн лэзь, дугдыты дышетскисьёстэ». ⁴⁰Нош Со ответ сетыса шуэм: «Тйледлы верасько: соос дугдйзы ке, изьёс черектйськозы».

* 19:38 Пс. 117:26.

⁴¹Иерусалимлы матэ вуэм бераз, солэн шораз учкыса, со сярысь малпаса бӧрдыны кутскем.

⁴²Собере Иисус шуэм: «Эй, Иерусалим! Туннэ нуналад ке но коть тон тодысалыд ке, кыче ужъёс каньыллыке мыныны тыныд юртто! Но али тынад син азысьтыд со ватэмын. ⁴³Уго тон доры вуозы сыче нунальёс, куке тушмонъёсыд окопъёс гудыса тонэ котыртозы, котыр ласянь тонэ жиптозы, ⁴⁴Инмарлэсь тон доры лыктон дырзэ тодымтэд понна, тонэ таркалозы, пушкад нылпиостэ виылозы, из вылад издэ но уз кельтэ».

⁴⁵Храме пырыса, Иисус отын вузкарысьёсты, басьяськисьёсты уल्याны кутскем. ⁴⁶Соослы Иисус шуэм: «Гожтэмын: ”Мынам коркае – вӧсяськон корка”, нош тй сое лушкаськисьёслы люкаськон интылы пӧрмытйды».

⁴⁷Котькуд нунал храмын дышетыса улэм. Архиерейёс, книга тодйсьёс, калыклэн тӧроосыз Сое виён амал утчаллям. ⁴⁸Но шедьтйллямтэ, кызы Сое виыны луысал, малы ке шуоно, вань калык, сӧрысьтыз кыльытэк, Сое кылзйськыса ветлэм.

20-тй ЛЮКЕТ

¹Одйгаз нуналэ, Иисус храмын калыкез дышетыса, Жеч Ивор вераса улон дыръя, Со доры архиерейёс но книга тодйсьёс тӧроосын чош лыктйллям ²но Соы шуиллям: «Милемлы вера, кыче кужымен Тон тае лэсьтйськод, кин Тыныд тае кужым сётйз?» ³Соослы ответ сётыса, Иисус шуэм:

«Мон но тїлесьтыд одїгез сярысь юало, вералэ Мыным: ⁴Иоаннлэн пылатонэз Инмысен вал-а, яке адямиос бордысен-а!» ⁵Нош соос куспазы вераськыса шуиллям: «"Инмысен" ке шуимы, соку шуоз: "Малы нош тї солы өд оске?"» ⁶"Адямиос бордысь" ке шуимы, вань калык асьмемыз изэн тышкалоз, уго калык Иоанн пророк вал шуыса оскыса улэ». ⁷Соин ответ сётїллям: «Ум тодїське, кытысь». ⁸Иисус соослы шуэм: «Мон но тїледлы уг вера, кыче кужымен тае лэсьтїсько».

⁹Иисус таңе мадёнэз калыклы вераны куткем: «Одїг адями виноград бакча мерттэм но сое виноград будэтїсьёс кие сётыса, кема дырлы кошкем. ¹⁰Ас дыраз, виноград будэтїсьёс доры виноград бакчаысь емшьёс мед сётозы шуыса, со ляльчизэ ыстэм. Нош виноград будэтїсьёс жугиллям сое, номыр но сётытэк келяллям. ¹¹Эшшо мукет ляльчизэ ыстэм, нош соос тазэ но жугыса, тышкаськыса номыр но сётытэк келяллям. ¹²Эшшо куинетїзэ ыстэм на, нош соос тазэ но ляльчиез вöсь, яраё карыса улляса лэзиллям. ¹³Соку виноград бакчалэн кузёез шуэм: "Мыным мар кароно? Ысто аслэсьтым яратоно пиме; оло нош, сое адзыса возьдаськозы". ¹⁴Нош виноград будэтїсьёс, сое адзыса, куспазы вераськиллям но шуиллям: "Та атай юртлы кузёе кылёно. Ойдолэ мыныса виёме сое, солы суроно ваньбур асьмелы луоз". ¹⁵Виноград бакча сьöры поттыса, сое вииллям. Виноград бакчалэн кузёез мар бен кароз соослы? ¹⁶Лыктоз но со виноград будэтїсьёсты виылоз, виноград бакчазэ мукетгёслы сётоз». Тае

кылэмьёс шуиллям: «Тазы ноку но медаз лу!»

¹⁷Нош Иисус шоразы учкыса шуэм: «Мар шуэм луэ тазы гожтэм:

”Корка пуктйсьёслэн кулэтэм карыса

куштэм иззы

корка сэреглэн пыдэсаз

инъет йыр луыса пуксем”?*

¹⁸Ваньмыз, кин та из вылэ усёз – пазыгиськоз; нош кин вылэ со усёз, сое паньгатоз». ¹⁹Со дыре архиерейёс но книга тодйсьёс Иисусэз киултыны турттыса утчаллям, но калыклэсь кышкаллям, уго валатскиллям, соос сярись та мадён верамын вал шуыса.

²⁰Иисус съёрын чакласькыса улйллям; йёно, оскись тусьем кариськыса, кыче ке но кыл вылын Сое кутыны но кузёйырёслы, кивалтйсь кие сётыны мед быгатозы шуыса, кескич адямиосты ыстйллям. ²¹Соос Иисуслэсь юаллям: «Дышетйсь! Ми тодйськомы, Тон шонер вераськод, дышетйськод; но кыче но ымныр шоры уд учкиськы, зэм Инмарлэн сюресэзлы дышетйськод. ²²Яра-а милем кесарьлы выт тырыны, яке уг яра-а?» ²³Нош Иисус, кескич сямзэс тодыса, соослы шуэм: «Малы тй Мынэсьтым визьме сынаськоды? ²⁴Возьматэ Мыным динарийдэс: кинлэн со вылын тусбуез но гожтйськемез». Соос шуиллям: «Кесарьлэн». ²⁵Иисус соослы шуэм: «Озы бере, кесарьлэсьсэ кесарьлы сётэлэ, нош Инмарлэсьсэ – Инмарль». ²⁶Калык

* 20:17 Пс. 117:22.

азьын Сое кыл вылын кутыны быгатйллямтэ, Солэн ответ сётэмезлы абдраса, шып кариськиллям.

²⁷Соку, «улзыса султон өвөл» шуыса, дышетйсь саддукейёс пöлысь куд-огез лыктйллям но Иисуслэсь юаллям: ²⁸«Дышетйсь! Моисей милемлы гожтэм: "Кинлэн ке кышнояськем агаез кулыса кышнозэ нылпитэк кельтйз ке, солэн выныз сое кышно вайыны но агаезлэсь кидыссэ утыны кулэ". ²⁹Сизьым агай-выньёс вылэм: нырысетйез кышнояськем но, нылпи кельтытэк кулэм. ³⁰Кыкетйез сое кышнолы ваем, соиз но нылпи кельтытэк кулэм. ³¹Куинетйез сое кышно басьтэм; ваньзы, сизьымназы ик, нылпи кельтытэк кулйллям. ³²Ваньзы бере кышномурт но кулэм. ³³Озы бере, улзыса султон нуналэ, кудзылы со кышно луоз? Сизьымназы но сое кышно каризы вал уго». ³⁴Иисус соослы ответ сётыса шуэм: «Та дуннелэн нылпиосыз кышноясько, бызё. ³⁵Сояз дуннее вуыны но кулэмьсь улзыса султыны кылдэмьёс уз но кышнояське, уз но бызе, ³⁶уз но кулэ ни, – соос кылчиньёслы ёшалозы. Улзыса султозы но, Инмарлэн пиосыз луозы. ³⁷Кулэмьёслэсь улзыса султонзэс Моисей но куак дорысен возьматйз, соку со Кузё-Инмарез Авраамлэн Инмарез, Исааклэн Инмарез, Иаковлэн Инмарез шуыса нимаз. ³⁸Инмар кулэмьёслэн Инмарзы өвөл, со улэпъёслэн Инмарзы. Инмар азьын ваньмыз улэпесь». ³⁹Та ласянь книга тодйсьёс пöлысь куд-огез шуиллям: «Дышетйсь! Тон умой верад». ⁴⁰Номыр сярысь но Солэсь юаны дйсьтйллямтэ ни. Иисус соослы шуэм: ⁴¹«Кызы верало, Христос Давид-

лэн Пиез шуыса-а? ⁴²Нош псалом книгаын ачиз Давид вера:

"Кузё-Инмар мынам Кузё-Инмарелы шуиз:

⁴³"Тушмонъестэ пыд улад понытозям,

Мынам бур палам пук".*

⁴⁴Озыен, Давид Сое Кузё-Инмар шуэ; кызы Со солэн пиез луоз?»

⁴⁵Вань калык кылзйськыса улыку, Иисус дышетесьсьёсызлы шуэм: ⁴⁶«Чаклаське книга тодйсьёслэсь: соос кузь дйськутэн ветлыны ярато, калык люкаськон интыосын зечкыламеэ, синагогаосын азьпал пуконэз, сиён-юонъёс дырря нырысетй радъёсын улонэз ярато. ⁴⁷Соос палкышноослэсь юртъерзэс сиё, чеберьяськыса кема вёсясько; со понна соос эшшо но юнгес судить каремын луозы».

21-тй ЛЮКЕТ

¹Иисус учкем но узырьёслэсь ваньбур тырон шыкысэ кузьым тыремзэс адзем. ²Озы ик Со отчы кык лепта понйсь куанер улйсь палкышноез адзем ³но шуэм: «Зэм ик тйледлы верасько: та куанер палкышно ваньмызлэсь уно коньдон понйз. ⁴Уго ваньмыз мултэсэз ваньысь Инмарлы кузьым тыризы, нош со куанер улыса но, кётсэ тырон понна маиз вань, ваньзэ понйз».

* 20:42-43 Пс. 109:1.

⁵Куд-огъёсыз храм сярысь со дуно изъёсын, кужымъёсын чеберъямын шуыса вераллям, соку Иисус шуэм: ⁶«Вуозы нунальёс, кукке, мае тй али адзиськоды, из вылэ из но уз кылы; ваньмыз куашкатэмын луоз».

⁷Солэсь юаллям: «Дышетйсь! Ку бен та луоз? Та луон азын кыче тодмет луоз?» ⁸Иисус шуэм: «Чаклаське, тйледыз медаз йыромытэ, малы ке шуоно, тросэз Мынам нимыным лыктозы но "Мон – Христос" шуозы. Сыче дыр матын ини. Соослэн сюрестйзы эн мынэ. ⁹Ожмаськонъёс, бугырьяськонъёс сярысь кылйды ке, эн кышкатске. Уго ваньмыз та луоно; но соку ик пумыз уз луы ай». ¹⁰Соку Иисус соослы шуэм: «Калык калыклы, эксэйлык эксэйлыклы ваче пумит султозы; ¹¹интыен-интыен кужмоесь музьем зурканъёс, сютэм аръёс, урод черъёс, инмысен көшкемыт адзонъёс, туж бадзымесь тодметъёс возматскозы. ¹²Но, ваньмызлэсь таослэсь азьвыл, тй вылэ кизэс вуттозы, тйледыз уллялозы, синагогаосы но пытсэтьёсы сётылозы, Мынам нимы понна эксэйёс азе, кивалтйсьёс азе нуозы. ¹³Соку тй Мыным оскемдэс возматоды. ¹⁴Но тае сюлмады возе: мар вералом шуыса азьло ик малпаськыса эн улэ. ¹⁵Мон тйледлы кыл но, визь но сёто, тйляд пумитъяськисьёсты пöлысь одйгез но соослы пумит кыл вераны, пумит султыны но уз быгатэ. ¹⁶Анай-атайёсты, агайвыньёсты тйледыз кутыса сётозы; куд-огдэс тй пöлысь виёзы но. ¹⁷Мынам нимы понна ваньмыз тйледыз адземпотостэм карозы. ¹⁸Но тйляд йырысьтыды йырсыды но арам уз луы. ¹⁹Чиданэн лувьестэс утелэ.

²⁰Адзиды ке солдатъёсын котыртэм Иерусалимез, соку тодэлэ, солэн тырттэм кылён дырыз матэ вуиз шуыса. ²¹Соку Иудея музейе учырамъёс гурезьёсы мед пегзозы. Кин городын ке, потэ отысь; кин солэн котыраз ке, эн пыры отчы, – ²²малы ке шуоно, та пунэм берыктон нунальёс, – мар гожтэмын, ваньмыз мед быдэсмоз. ²³Кайгу луоз со нунальёсы нуны ваёноослы, нуны нонтйсьёслы; уго музейем вылын туж бадзым шугадзон луоз, Инмарлэн вожпотонэз та калык вылэ усёз. ²⁴Усьылозы лэчыт палаш улэ; вань калыкъёс пöлы пленэ нуэмын луозы. Язычникъёслэн дырзы бырытозь, Иерусалимез язычникъёс лёгаса возёзы.

²⁵Шундыын но, толэзын но, кизилиосын но тодметъёс луозы, нош музейем вылын – калыкъёс мылкыдзы куашкаса, абдраса улозы. Зарезь туж шаугетоз, бугырьяськоз. ²⁶Адямиос кышкаса, дунне вылэ шугадзонъёслэсь вуэмзэс возьмаса чоньдылозы, малы ке шуоно, ин кужымъёс вырзозы. ²⁷Соку пилем вылын быдзым кужымен но данлыкэн лыктйсь Адями Пиез адзозы. ²⁸Та быдэсмыны кутскем бере, соку шонертйськыса йырдэс жутэ, – тйляд мозмытсконды матэ вуэ».

²⁹Иисус соослы мадён верам: «Смоквапу шоры, вань писпуос шоры учке. ³⁰Соос куар поттыны кутско ке, тае адзыса, гужем матын ини шуыса, тодйськоды. ³¹Озыы ик тй но та тодметъёслэсь быдэсземзэс адзиды ке, тодэлэ, Инмар Эксэйлык матын ини шуыса. ³²Зэм ик тйледлы верасько: та выжы бырытозь, ваньмыз но та луоз. ³³Ин но музейем бырозы, нош Мынам кыльёсы уз быре.

³⁴Асьтэдыз асьтэос чаклалэ: сюлэмьёсты мултэс сиыса, вина юыса, та улонлэн сюлмаськоньёсынызы секыт медаз улы но со нунал тйледыз шөдтэк шорысь медаз куты шуыса: ³⁵уго со музьем вылын вань улйсьёс доры калтон кадь лыктоз. ³⁶Озьиен, котькыче дыре но сак улэ, вöсяське, вань шугадзоньёслэсь утиськыны но Адами Пи азе султыны мед быгатоды».

³⁷Нуназе Со храмын дышетэм, нош уйёсы потыса, Елеон шуон гурезьын ортчытьям. ³⁸Вань калык чукна ик Иисус доры храме Сое кылзйськыны ветлэм.

22-тй ЛЮКЕТ

¹Матэ вуэм юмал нянь сиён праздник, кудзэ Быдзымнунал шуо. ²Архиерейёс но книга тодйсьёс Сое кызыы ке но виён амал утчаллям, но калыклэсь кышкаллям. ³Дас кык пöлысь одйгезлэн Искарот шуон Иудалэн пушказ шайтан пырем. ⁴Со мынэм но архиерейёсын, кузёйырёсын Иисусэз кутыса сётон сярись вераськем. ⁵Соос шумпотйллям но солы коньдон сетоно кариськиллям. ⁶Иуда кыл сётэм но, калыктэм азысен Сое кутыса сётон вылысь, кельшымон дыр утчам.

⁷Юмал нянь сиён нунал вуэм, соку Быдзымнунал ыжпиез вандыны кулэ вылэм. ⁸Иисус Петрен Иоаннэз ыстэм но шуэм: «Мынэлэ, милемлы Быдзымнунал сиён дасялэ». ⁹Иисуслэсь соос юаллям: «Кытчы милемыз дасяны косйськод?» ¹⁰Соослы

Со шуэм: «Тани, тй городэ пырыкуды, пумитады кувшинэн ву нуись мурт шедёз; кудаз корка со пыроз, со съёры мынэ. ¹¹Коркалэн кузёезлы шуэлэ: "Дышетйсь тынэсьтыд юа: кудаз комнатаын Мон Аслам дышетскисьёсыным валче Быдзымнунал сиёнэз сиё?" ¹²Со тйледлы коркалэсь вёлдыса дасям бадзым палзэ возъматоз; отчы дасялэ». ¹³Соос мынйллям но адзыллям озыы, кызыы Со верам. Быдзымнунал сиён дасяллям.

¹⁴Часэз вуэм но, дас кык апостольёсын ёош Со жок съёры пуксем. ¹⁵Иисус соослы верам: «Аслам курадзонэлэсь азыло, Мынам туж потэ вал тйледын валче та Быдзымнунал сиёнэз сиеме. ¹⁶Тйледлы верасько: Инмар Эксэйлыкын со быдэсмытозь, сое уг ни сиы». ¹⁷Чаша кутыса, тау карыса, шуэм: «Басьтэлэ тае но куспады люкылэ. ¹⁸Тйледлы верасько: Инмар Эксэйлык вуытозь, виноград емышлэсь уг ни юы». ¹⁹Нянь басьтыса, тау карыса, тйялтэм но соослы вераса сётэм: «Та Мынам Мугоры, кудйз тй понна сётйське; Монэ тодады вайыса, тае быдэсьялэ». ²⁰Жытан бере, со сямен соослы чашаез но сётэм вераса: «Та чаша луэ виль сйзён Мынам Вирам, кудйз тй понна кисьтйське. ²¹Тани, Монэн огазын жок вылын Монэ кутыса сётйсьлэн кыыз. ²²Адями Пи гожтйськемъя мынэ ке но, куректон луоз со муртлы, кудйз пыр Со кутыса сётйське». ²³Соос ог-огзылэсь юаны кутекиллям, соос пёлысь кин меда со, кудйз тае лэсьтоз шуыса.

²⁴Соос пёлысь кудзэс бадзымез шуыса лыдьян пумысен соос куспын ченгешон но вылэм. ²⁵Иисус

соослы шуэм: «Эксэйёс кузёясько калыкен, соосты кутыса возисьёс зеч карисьёс шуыса нимасько. ²⁶Нош тй озьы эн: кин тй пöлысь бадзымез, покчи мурт кадь кариськы, нош кузёяськись-кивалтйсь – медо кадь. ²⁷Кин бадзымгес: сиськись-а, яке утялтйсь-а? Сиськись öвöл-а? Нош Мон тй пöлын медо кадь. ²⁸Визь сынаськыса улон дырьёсы, тй Монэн огазын луоды. ²⁹Кызы Мыным Атае сйиз, Мон но тйледлы Эксэйлык сйзисько, ³⁰Эксэйлыкысьтым жöк сьöрам мед сиёды, мед юоды, престольёс вылэ пуксьыса, Израильлэсь дас кык выжызэ судить кароды».

³¹Кузё-Инмар шуэм: «Симон! Симон! Тани, шайтан куриз вал тйледыз чабеез кадь пужныны. ³²Но Мон тон понна вöсяськи, тынад осконэд медаз начармы вал шуыса. Тон нош ик берыктйськид ке, агай-выньёстэ юнматы». ³³Петр Солы ответ сётэм: «Кузё-Инмаре! Тонэн чош мон пытсэтэ но, кулыны мыныны но дась». ³⁴Нош Иисус солы шуэм: «Тыныд верасько, Петр, туннэ атас чортытозь, Монэ уд тодйськы шуыса, куинь пол куштйськод».

³⁵Иисус дышетскисьёсызлы шуэм: «Мон тйледыз пуйытэк, сумкатэк, пыдкучантэк ыстылй, малы ке но ёрмыса улйды-а?» Соос ответ сётйллям: «Номырлы но öм ёрме». ³⁶Соку Иисус соослы шуэм: «Нош табере, кинлэн пуйыэз вань, басьты сое, озьы ик сумка но; нош кинлэн öвöл, дйськуттэ вуза но палаш басьты. ³⁷Тйледлы верасько: Мон вылын быдэсмыны кулэ тазы гожтйськем но: "Законтэк улйсьёсын оградэ пыртэмын луоз". Уго

мар Мон сярись верамын, жоген ваньмыз быдэс-моз ини». ³⁸Соос шуиллям: «Кузё-Инмар! Тани татын кык палашьёс». Иисус соослы шуэм: «Тыр-моз».

³⁹Потэм но огдышемен ик Елеон гурезе мынэм. Со бёрсы дышетскисьёсыз но мынйллям. ⁴⁰Ин-тыязы вуэм бере, соослы шуэм: «Вёсяськелэ, визь сынаськонэ медад сюре шуыса». ⁴¹Нош Ачиз соос дорысь из лэзыса вуттымон кеме кошкем но пид-саськыса вёсяськем, ⁴²собере шуэм: «Атае! Та ча-шаез Мон вөзтй ортчытыны зеч эриктэ сётыса-лыд ке! Но со Мынам эрикя медаз лу, Тынадья мед луоз». ⁴³Инмысь кылчин вуэм но Сое юнма-тыса улэм. ⁴⁴Шугадзёнёс пöлын улыкуз, эшшо но тыршыса вёсяськем. Солэн пöсямез музьем вылэ усыльйсь вир шапыкьёс кадесь вылэм. ⁴⁵Вё-сяськемысь султыса, Со дышетскисьёсыз доры лыктэм но адзем, соос куректэменызы изё вылэм шуыса. ⁴⁶Иисус соослы шуэм: «Малы тй изись-коды? Визь сынаськонэ медад сюре шуыса, султэ но вёсяське».

⁴⁷Иисус тае вераса улон куспын, калык вуэм. Соослэн аязы лыктэм дас кык дышетскисьёс пöлысь одйгез, Иуда нимоез. Со Иисус доры, Сое чупаны шуыса, матаз мынэм. Уго соослы Иуда таёе тодмет верам: «Кинэ чупало, Со ик со вань». ⁴⁸Нош Иисус солы шуэм: «Иуда! Чупаса-а тон Адами Пиез вузаськод?» ⁴⁹Соин огазын луэмьёс, адзыса кытчы мынэ ужпум, Солы шуыллям: «Кузё-Инмар! Палашен ум шукке-а?» ⁵⁰Соос пö-лысь одйгез архиерейлэн ляльчиезлэсь бур пельзэ

чогыса уськытэм. ⁵¹Соку Иисус шуэм: «Дугдэ, тыр-
моз». Солэн пель бордаз йөтйськыса бурмытэм
сое. ⁵²Солы пумит люкаськем архиерейёслы, храм-
лэн кузёйырёсызлы, төроослы Иисус шуэм:
«Йырвандйсь мурт доры сямен, палашъёсын,
зырьёсын Монэ кутыны потйллям! ⁵³Котькуд
нунал Мон тйледын огазын храмын вал, тй Мон
вылэ кидэс өд жутэ. Но али – тйляд дырды, пей-
мыт улонлэн кузёяськон вакытэз». ⁵⁴Иисусэз ку-
тыса нуиллям, архиерейлэн корказ ваиллям. Нош
Петр палэнэтй мынэм. ⁵⁵Гидкуазь шоры тылскыса
огазе пуксем беразы, Петр но соос куспы пуксем.
⁵⁶Одйг медо нылкышно солэсь тыл дорын пукемзэ
адзыса, со шоры сак учкем но шуэм: «Таиз но
Соин чош вал». ⁵⁷Нош со Иисуслэсь куштйськем
но кышномуртлы шуэм: «Мон Сое уг тодйськы». ⁵⁸
Жоген мукетыз, сое адзыса шуэм: «Тон но соос
пöлысь». Нош Петр та адямины шуэм: «Öвöл». ⁵⁹
Одйг час мында дыр ортчем, эшшо кин ке но
гижысь-пиньысь кутскыса верам: «Зэм ик, таиз
но Соин чош вал, уго со Галилеяысь мурт». ⁶⁰Нош
Петр со адямины шуэм: «Уг тодйськы, мар тон
вераськод». Соку ик, со вераськон куспын, атас
чортэм. ⁶¹Соку Кузё-Инмар берыктйськыса Петр
шоры учкем; нош Петр Кузё-Инмарлэсь верам
кылзэ тодаз ваем: «Атас чортытозь, куинь пол
Мынэсьтым куштйськод». ⁶²Педло потыса, зар
бөрдыны кутскем.

⁶³Иисусэз кутыса возись адямиос Сое сантэм ка-
риллям, жугиллям. ⁶⁴Шобыртыса, Солэн ымныраз
тышкаллям но Солэсь юаллям: «Тодма но вера,

кин Тонэ шуккиз?»⁶⁵ Солы пумит трос мукет сан-тэман кыльёс вераллям на.

⁶⁶Нунал вордйськем бере, калыклэн төроосыз, архиерейёс, книга тодйсьёс люкаськиллям. Соос Иисусэз асьсэлэн синедрионазы пыртйллям ⁶⁷но шуиллям: «Тон-а Христос? Вера милемлы». Иисус соослы шуэм: «Тйледлы верай ке но, тй уд оске; ⁶⁸тйлесьтыд юай ке но, тй Мыным ответ уд сётэ, уд но лэзе Монэ. ⁶⁹Табере Аядми Пи Инмар кужымлэн бур палаз пуксёз». ⁷⁰Ваньзы шуиллям: «Озьыен, Тон Инмар Пи?» Иисус соослы ответ сётэм: «Тй вераськоды, Мон шуыса». ⁷¹Нош соос шуиллям: «Асьмелы кыће возъматон-тодытон кулэ на? Уго ми асьмеос Солэн ымысьтыз потэм кыльёсты пельынымы кылймы!»

23-тй ЛЮКЕТ

¹Соос ваньзы султйллям но Иисусэз Пилат доры нуиллям. ²Сое янгыше уськытыны кутскиллям, шуиллям: «Ми адзимы, кызьы Со калыкмес сурапожа, кесарьлы выт тырыны уг лэзьы, Ассэ Христос Эксэй шуэ». ³Пилат Солэсь юам: «Тон Иудейёслэн Эксэйзы-а?» Иисус солы ответ сётыса шуэм: «Тон шуиськод». ⁴Пилат архиерейёслы но, калыклы но шуэм: «Та Аядмилэсь мон нокыће но шексэ уг шедьтйськы». ⁵Нош соос асьсэлэн кыл вылазы эшшо но зол сылыса вераллям, быдэс Иудеятй, Галилеяысен кутскыса, та интыозь дышетыса ветлэ, Со калыкез огыр-бугыр каре шуыса.

⁶Галилея сярысь кылыса, Пилат юам: «Со Галилеяысь мурт шат?» ⁷Иисус Иродлэн ёросысьтыз шуыса тодэм но, Сое Ирод доры ыстэм, кудйз та нунальёсы озыы ик Иерусалимын вылэм. ⁸Иисусэз адзыса, Ирод туж шумпотэм, уго кема дыр чоже ини Сое адземез потыса улэ вылэм, малы ке шуоно, Со сярысь трос кылэмез вылэм ини, нош озыы ик оскиськем Солэсь кыче ке но паймымон ужзэ адзыны. ⁹Иисуслы трос юанъёс сёткам, нош Со юанэзлы чик но ответ сётымтэ. ¹⁰Архиерейёс но книга тодйсьёссылллям но кужмысь Сое янгыше уськытыны выриллям. ¹¹Нош Ирод аслаз солдатъёсыныз, Сое сантэмамзы, ултйямзы бере, Со вылэ югыт чиясь дйськут дйсяса, берен Пилат доры келятэм. ¹²Та нуналэ Пилат но Ирод куспазы эшъёс луиллям, нош азьвыл тушмонъяськыса улйлллям.

¹³Пилат архиерейёсты, кузёйыръёсты, калыкез ётыса, ¹⁴соослы шуэм: «Тй мон доры Та Адямиез калыкез сура-пожа шуыса ваиды. Тани, мон тй азын чаклай-эскери но, Та Адямилэсь нокыче но уродзэ-шексэ, кудйныз тй Сое янгыше уськытйськоды, мон ой шедьты. ¹⁵Ирод но озыы ик: со доры мон Сое ыстылй, но Сое виыны ярамонэз номыр но өз сюрэ. ¹⁶Озыен, Сое вось каро но лэзё». ¹⁷Праздник понна солы кулэ вылэм одйгзэ жильыетын пукись муртэ лэзыны. ¹⁸Но вань калык черекъяны кутскем: «Кулон Солы! Милемлы Варавваез лэзь». ¹⁹Варавва пытсэтэ сюрэм, городын бугыръяськон жутэм но адями вием понназ. ²⁰Иисусэз лэзыны турттыса, Пилат нош ик куа-

разэ будэтэм. ²¹Нош соос кесяськиллям: «Кортчога, кортчога Сое!» ²²Пилат куинетй ползэ соослы шуэм: «Кыче урод уж Со лэсьтйз? Мон Солэсьнокыче но виыны ярамон мугзэ ой шедьты; соинк, Сое вöсь каро но лэзё». ²³Нош соос бадзым куараен дугдытэк черекъяллям, Иисус кортчогамын мед луоз шуыса. Архиерейёсын чош кесяськыса соос вормиллям. ²⁴Пилат соослэсь куронзэс быдэстыны малпам. ²⁵Бугырьяськон жутэм но адями вием понназ пытсэтэ пуктэм муртэ, кудзэ соос куриллям, лэзем, нош Иисусэз соослэн ки улазы сётэм.

²⁶Иисусэз нуыкузы, бусыысь бертйсь Киринаеясы кыче ке но Симонэз кутйллям но, Иисус бöрсый мед нуоз шуыса, вылаз кирос понйллям. ²⁷Со бöрсый туж трос калык мынэм, кышномуртёс но, кудьёсыз Со понна бöрдйллям, виышъяллям. ²⁸Нош Иисус соос пала берыктйськыса шуэм: «Иерусалимлэн нылъёсыз! Мон понна эн бöрдэ, асьтэос понна, асьтэлэн нылпиосты понна бöрдэ; ²⁹уго вуо сыче нунальёс, куке шуозы: "Шудоесь нылпи вайыны быгатйсьтэмъёс, нылпи вайымтэ пушъёс, нылпи сюдымтэ ноныос!" ³⁰Соку гурезьёслы шуозы: "Ми вылэ уселэ!" Мувыръёслы: "Шобыртэлэ милемыз!" ³¹Вожектйсь писпуэн озы каро ке, нош кöсэныз мар луоз?!»

³²Соин чош кык йыруж лэсьтйсьёсты виыны нуиллям. ³³«Кымыс» шуон интые вуэм безы, отын Сое кортчогаллям, йыруж лэсьтйсьёсты – одйгзэ бур палаз, нош мукетсэ – паллян палаз. ³⁴Иисус шуэм: «Атае! Соослы простить кар, уго

соос мар лэсьтэмзэс уг тодо». Пус чёлтыса, Солэсь дйськутсэ люкылллям. ³⁵Калык учкыса сылэм. Соосын валче кузёйыръёс мыскылляськыса сылллям но вераллям: «Мукетъёссэ утылйз, Ассэ Ачиз мед утёз, Инмарлэн быръем муртэз Христос ке Со». ³⁶Солдатъёс но Сое исамес карылллям, дораз лыктыса, Сола уккус сётыса ³⁷вераллям: «Иудейёслэн Эксэйзы ке Тон, уть Астэ Ачид». ³⁸Солэн вылйяз грек, рим но еврей кылын гоштэмын вылэм: «Та Иудейёслэн Эксэйзы».

³⁹Йыруж лэсьтэм понна ошемъёс пöлысь одйгез Сое урод кыльёсын тышкаськем но шуэм: «Тон Христос ке, уть Астэ, милемыз но». ⁴⁰Нош мукетыз сое буйгатыны вырем но шуэм: «Тон Инмарлэсь уд курдаськы шат, кукке ачид но таçелы ик судить каремын? ⁴¹Асьмеос шонер судить каремын, малы ке шуоно, урод ужъёсмылэсь емышсэс бичаськомы, нош Со номыр но уродзэ öз лэсьты». ⁴²Иисуслы шуэм: «Аслад Эксэйлыкад вуид ке, монэ буре вай, Кузё-Инмаре!» ⁴³Иисус сола шуэм: «Зэм ик тыныд верасько, туннэ ик Монэн огазын райын тон луод».

⁴⁴Нуназе, куатетй час вадес вылэм, укмысэтй час котырозь быдэс дунне вылын пеймыт луэм: ⁴⁵шунды кысэм, храмысь катанчи шортйз ик кесиськем. ⁴⁶Иисус бадзым куараен вазиськыса шуэм: «Атай! Тынад кияд Аслэсьтым лулме сётисько». Тае верам бераз, лулыз потэм. ⁴⁷Ваньзэ та ортчемез адзем бераз, сю солдатэн кивалтйсь Инмарез даньяса шуэм: «Зэм ик, Та Адями шонер улйсь вал». ⁴⁸Та возматонэ люкаськем вань калык, мар

луэмез адзыса, гадязы шуккылыса-шуккылыса бертйллям. ⁴⁹Нош ваньмыз Иисусэз тодэмъёс но Галилеяысь Со бӧрсьы лыктэм кышноос, палэнын сылыса, тае учкыса улйллям.

⁵⁰Соку Иосиф нимо иудей кенешлэн муртэз, лякыт сямо, шонер улйсь адями, ⁵¹кенешлэн кутэм пуктон-косонъёсыныз, ужъёсыныз соглаш луымтэ. Иосиф Иудеялэн Аримафея карысьтыз вылэм. Со Инмар Эксэйлыкез витыса улэм, ⁵²Пилат доры лыктэм но Иисуслэсь Мугорзэ курем. ⁵³Иисуслэсь мугорзэ кирос бордысь басьтэм но тӧды дэраен биням, собере шайгуэ понэм. Со гурезысь из пушкы гудзыса лэсьтэмын вылэм, отын нокин но тыремын вылымтэ на. ⁵⁴Со пятница нунал вылэм, суббота вуэ вылэм ни. ⁵⁵Иисусэн ёош Галилеяысь лыктэм кышноос мынйллям но шайгуэз учкиллям, соос адзиллям, кызыы Солэн Мугорыз понэмын вылэм. ⁵⁶Гуртазы бертйллям но ческыт зыно макеос, зыран вӧйёс дасяллям. Моисей законлэсь курон-косонъёссэ быдэсьяса, суббота нуналэ номыр но ужатэк улйллям.

24-тй ЛЮКЕТ

¹Арнялэн нырысетй нуналаз, туж вазь ик, зыраны дасям ческыт зыно вӧйёссэс вайыса, кышно-муртъёс шайгу доры лыктйллям. Соосын валче куд-ог мукетъёс но лыктйллям. ²Соос адзиллям: шайгу дорысь из палэнтэмын. ³Пушказ пыриллям, но Кузё-Инмарлэсь Иисуслэсь Мугорзэ шедь-

тйллямтэ. ⁴Та пумысен паймыса улон дыръязы, шодтэк шорысь соос азе пиштйсь дйськутэн кык пиосмуртьёс султйллям. ⁵Кышкаса, йырзэс ошыса улыкузы, соослы шуиллям: «Мар тй улэпез кулэмьёс пöлысь утчаськоды? ⁶Со татын öвöл: Со улзыса султйз. Тодады вае али, Галилеяын дыръяз, кызыы Со тйледлы вераз вал: ⁷”Адями Пи сьöлыкко муртьёслэн киязы кутыса сётэмын, кортчогамын но куинетй нуналаз улзыса султэмын луыны кулэ” шуэмзэ». ⁸Солзсь кыльёссэ соос тодазы ваиллям. ⁹Шайгу дорысь берытскиллям но ваньзэ тае дас одйгезлы ик апостольёслы, мукетьёслы но, – ваньмызлы ивортйллям. ¹⁰Татын вылэм Магдалина Мария, Иоанна, Иаковлэн анаез Мария но мукет кышномуртьёс. Соос та сярись апостольёслы ивортйллям. ¹¹Соослэн верамзы токма кыльёс кадь гинэ потэм, соин ик соослы оскиллямтэ. ¹²Нош Петр султэм, шайгу доры бызьыса мынэм, мыкыртйськыса учкем но кыллись шобретэз гинэ адзем, ас понназ ачиз ортчем ужьёслы паймыса, берлань кошкем.

¹³Со нуналэ ик, дышетскисьёс пöлысь кыкез мыно вылэм Иерусалимысен ог куатьтон стадия кеме интыяськем Еммаус шуон гуртэ, ¹⁴вань луэм ужьёс сярись куспазы вераськыса мыно вылэм. ¹⁵Соос куспазы вераськыса, малпаськыса мынон дыръя, Ачиз Иисус, матазы лыктыса, соосын чошмынэм. ¹⁶Синьёссы соослэн кыниськемын вылэм, соин ик соос Сое тодмаллямтэ. ¹⁷Иисус соослы шуэм: «Мар сярись тй куспады вераськыса мынйськоды, малы тй жожмытэсь?» ¹⁸Соос пö-

лысь одйгез, Клеопа нимоез, Солы ответ сётыса шуэм: «Иерусалиме лыктэмъёс пöлысь, оло, Тон огнад уд тодйськы на-а, та нунальёсы отын мар луэм сярысь?»¹⁹ Иисус соослэсь юам: «Мар сярысь?» Солы соос шуиллям: «Мар вал Назаретысь Иисусэн, Кудйз пророк вал. Инмар азын, вань калык азын но Со ужын но, кылын но кужмо вал.²⁰ Сое милям архиерейёсмы но кузёйырёсмы виыны судить карон понна кутыса сётйзы но Сое кортчогазы. ²¹Нош ми оскиськиськомы вал, Со луэ Ачиз, Кудйз Израилез мозмытыны кулэ. Но, тани, табере туннэ куинетй нуналэз ини, кызы та ваньмыз ортчиз. ²²Нош куд-огез нылкышноосмы милемыз паймытйзы: соос вазь ик шайгу дорын выйлллям, ²³но Солэсь Мугорзэ шедьтиллямтэ. Берытскизы но, кылчинъёслэсь возматскемзэс адзимы шуыса, вераськизы; кылчинъёс Со улэп шуыса вераллям. ²⁴Милямъёс пöлысь но куд-огез шайгу доры мыныса аджиллям озьы ик, кызы кышномуртъёс веразы; нош Сое аджиллямтэ». ²⁵Соку Иисус соослы верам: «Э, нодтэмъёс, сюлмыныды пророкъёслэн азыланез сярысь вань верамъёссылы оскыны дыг муртъёс! ²⁶Тазы кулэ ой вал-а Христослы курадзонэз чиданы но Аслаз пиштйсь данлыказ пырыны?» ²⁷Моисей бордысен кутскыса, вань пророкъёслэсь, быдэс Священной Гожтэмысь Со сярысь верамзэс валэктыса улэм. ²⁸Мыноно гуртсылы матэ вуиллям. Азылане мыныны турттйсь мурт кадь Иисус кариськем, ²⁹нош соос Сое кошкыны лэзыйтэк выриллям: «Милемын огазын кыль, уго нунал жыт пала кыстйське

ини». Иисус корка пырем но соосын огазе кылем.
³⁰Соосын сиськыса улыкуз, нянез басьтыса бакель карем, тйялтэм но соослы сётэм. ³¹Соку соослэн синъёссы усьтйськиллям но соос Иисусэз тодмаллям. Нош Иисус соос понна адскисьтэм луэм.
³²Соос ог-огзылы шуиллям: «Асьмелэн пушкамы сюлэммы өз жуа-а, куке Со асьмелы сюрес вылысен вераз, куке Гожтэмез асьмелы валэктылйз?»
³³Султйллям но со часын ик Иерусалиме берытскиллям, огазъысь дас одйгназэс ик апостольёсты шедьтйллям, соосын ёш мукетъёссэ но. ³⁴Соос вераллям, Кузё-Инмар зэмзэ ик улзыса султйз но Симонлы возматскиз шуыса. ³⁵Нош соос сюрес вылын мар луэм сярысь вераллям, кызы соос Иисусэз нянь тйялтыкуз тодмазы.

³⁶Та сярысь вераськыса улыкузы, Ачиз Иисус соослэн пёлазы султэм но соослы шуэм: «Ваньдылы каньыл мед луоз». ³⁷Соос куалектыса, кышкаса, пёртмаськись духез адзиськом шуыса малпаллям.
³⁸Нош Иисус соослы шуэм: «Марлы куалекъяськоды, малы таё малпанъёс тйляд сюлмады пыро? ³⁹Учкелэ Мынам киосы, пыдъёсы шоры. Мон ук со! Йётйське Мон борды, учкелэ; уго духлэн мугорыз но, лыосыз но өвёл, Мынам кадъ». ⁴⁰Тае верам но, соослы кизэ, пыдзэ возматэм. ⁴¹Куке соос шумпотэменызы, оскытэк паймыса улйллям, Иисус соослы шуэм: «Вань-а тйляд татын кыёе ке но сиёнды?» ⁴²Солы соос пыжем чорыг локет но карасэн чечы сётйллям. ⁴³Сиёнзэс басьтыса соос азын сиём.

⁴⁴Собере соослы Иисус шуэм: «Тани со, кудйз сярысь, эшшо тйледын огазын улыкум, Мон верай вал: Моисейлэн законаз, пророкъяслэн но, псаломъясын но Мон сярысь вань гожтйськем быдэсмыны кулэ». ⁴⁵Соку, Гожтэмъясыз валан понна, соослэсь визьзэс усътэм ⁴⁶но соослы шуэм: «Тазы гожтэмын, тазы ик луоно вал: Христослы курадзонэз адзыны но куинетй нуналаз улзыса султыны. ⁴⁷Солэн нимыныз съолькъяс понна обкелён но съолькъясты куштон сярысь тодытон Иерусалимысен кутскыса, вань калыкъяс пöлын верамын луыны кулэ. ⁴⁸Нош тй тае адземдэс ивортйсьяс луиськоды. ⁴⁹Атаелэсь сйзем сётонзэ Мон тй вылэ лэзисько. Вылысь сётэм кужымен шобырскытозяды, тй Иерусалимын улэ».

⁵⁰Соосты, городысь поттыса, Вифания доры вуттэм но, Аслэсьтыз кизэ жутыса, соосты бакель карем. ⁵¹Бакель карыкуз, соослэсь палэнтйськыны но Инме жутскыны кутскем. ⁵²Солы йыбырттиллям но быдзым шумпотонэн Иерусалиме берытскиллям, ⁵³Инмарез данъяса, тау карыса, ялан вöсяськыса храмын уйллям. Аминь.